

灌志文徵卷三

碑誌上

置丈人觀碑全唐文人趙明誠金石錄青城山丈按祠廟碑即指此

徐太亨



夫丈人山者本青城山周回二千七百里高五千一百丈即道家第五寶仙九室之天矣黃帝拜為五岳丈人因以為稱服朱光之袍戴蓋天之冠佩三庭之印乘科玉之車五岳上司六時降水仙唱冷冷而霄轉神燈爛爛而夕照仙都衆妙之奧福地會昌之城張天師羽化之處焉其為狀重山疊障巨壑幽溪藏金而崎岸穹崇蘊玉而林篁潤澤紅巖爭出絳岑攢秀上巍峨而勢斷於空下崕呀而不見於底紫氣曉靄黛色晴濃欹崖巖谷而中豁穹石隱嶙而同跨削戍超華峻極逾嵩錦峯懸鳥兔之輝赤水截虹霓之影則有靈芝擢秀芳桂叢生龍篠嬋娟而駢峙塵松森梢而重列水因祈而愈疾山

灌志文徵

卷三

碑誌上

至感而登仙龜鶴於是乎棲游鸞鶴於是乎翔集露光懸白即盈隱士之林霞氣飛紅遂映仙家之酒至夫惚恍幽象宵冥醜迹怪異休徵鬼神情狀則宣所不談矣我開元神武皇帝執持大象恢宏秘籙天宇廓清人寰交泰蚩尤害盡訪道於崆峒華封喜來尋真於姑射郊禋天地大禮也望秩山川巡守也封勒岱宗報成也巡謁五陵至孝也講習二言崇道也飾禮神之館增類帝之壇禋於六宗徧於五岳尊明號擁神休河洛獻圖書山川出車馬將以下咸五上登三與日月以齊明並乾坤而合德南山獻壽巍巍而永固西母進圖明明而本立則夏殷周漢將何以傳議哉奉開元十八年閏六月十八日勅於青城丈人山置祠室又奉今年八月二十一日勅青城丈人山宜令所管州縣揀本山幽靜處與立祠廟其圖分付道士將往建立銀青光祿大夫使持節蜀州諸軍事蜀州刺史上柱國昌平縣開國侯臣楊勵本忠孝

是資公清在職惠而綏物刑以平邪三刀之州縣克寧五符之功助獨効奉
遵宸旨恭維靈廟親畫規模改興版築亟勤冰節採構雲林計日而成工徒
不擾至若輪奐光華崇蔚晶麗倚碧巖而斜構面絳潭而宏峙栱櫨特出棼
檠迭施虹梁數重虬簷四起丹楹霞翬紫壁冰淨豐雄而曉挂斷雲皎晶而
夜懸明月棟宇成矣彰聖主之崇恩堂室巋然想神靈之是愛足可殷薦芳
果尊奠馨稷又奉八月二十五日勅青城丈人廟准五岳真君廟例抽道行
道士五人焚香供養聖恩覃溢天澤洪沛神姿麗美遠降於九天寶像昭輝
長存於三蜀固當保持薦祉扶護聖躬鳳曆千秋龍居萬歲豈蓬萊方丈久
視長生哉縣令薛椅錦製臨人絃鳴作宰惠存惇獨威息奸豪道揚三教政
兼五縣僉謂揚洪徽騰茂烈大功必欣於刊勒大仙必期於福應微臣弱翰
職慰斯勞黃卷雖勤玄經已老庶夫紀功銘石地久天長山岳之靈迹載揚

灌志文徵

卷三

碑誌上

一一

江漢之豐碑獨立其詞曰聖人大造澤及山川秩宗望祭通幽洞玄惟此靈
岳代出神仙丹丘紫府逗月乘煙虔奉宸渙創營靈室峻宇千里回軒抱日
虹梁載構虬簷突出燦爛孤雄巍峨罕匹天降神像飾以丹青真空曠曠仙
壁瑩瑩蘋蘩入奠黍稷陳馨光深岷曲色照江汀英英仙使奉宣明旨勤勤
良牧至公而理式建華堂長開靈祀福庭幽寂齋壇廻起神功可紀聖德長
存勒此銘石傳諸後昆景福胥蛩神報國恩宗支百代子子孫孫

焦夫子碑

周表

蜀之故老傳岷江有焦夫子者國初時人亡其名飽詩書以博學教導人世
人稱夫子云夫子貌寢陋且怪長目而廣鼻海口而蚪髻瘤纍纍絡頷下性
直率不自飾雖冠帶往往爬痒捫虱腰跨間忽爲歌詩則奇章異句有足駭
人耳目者今人止能誦其一聯兩輪日月磨興廢一合乾坤夾是非豈非所

謂古之隱君子歟熙甯中吾鄉賢士文與可遊天彭館倅舍之徐公園盃酒談笑中忽放筆繪夫子之像於學之壁不數筆而成之經歲既久幾至泯滅元豐壬戌歲聶公子因守是郡惜其瀟灑神妙之跡或隱晦不顯遂徙其壁於西湖之凝翠亭焉嗟夫天下之人皆有所好然得其所以好者寡矣與可之於畫也縱橫意思類皆山石竹木枯槁古澹之物故其於人也亦愛夫清淨奇偉有道之士此真得天下所以好者歟公之遷是壁也其重與可之畫而因留夫子之像歟抑重夫子之像而不忘與可之畫歟是未可知而要其瀟然高寄獨能好與可之所好吾知二子者之俱重於公也其與隨時俯仰者相去遠矣公索記敢直書云云

移建離堆山伏龍觀刻石文

馮伉

夏書禹貢導江績以出岷山秦史河渠鑿離堆以洩沫水懷襄昏墊之憂平

灌志文徵

卷三

碑誌上

三

之於前夏后錫圭而鑄鼎渚洳瀕洞之患濬之於後李公鬪牛而沉犀惠我無疆奕世載德以視夫鄭國分渠於渭上西門引漳於河朔功相萬也左思曰指渠口以爲雲門灑滂池而爲陸澤如李公者不其然乎非夫有道之士智仁勇三者足備者與且驅風雲運神化翦妖厲輝照竹帛享祀豐潔其在神仙之品得非漢天師許旌陽之徒與離堆山伏龍觀者俗傳李公誅邪壓怪之所腴田沃野之會也今其雲壁高坼霜濤中注靈阜嶙峋以磅礴沖淵澎湃而灑灑偃偃灘澹清振林谷有若長蛟斷於陽羨支祈鏢於淮泗無復害矣每歲孟春役徒萬億太倉爲之給粟長吏爲之督工築之繩之決之防之乘時以興比月而息支分派散環繞糾錯連州越郡膏沐千里雖密雲灑霽愆陽蘊隆而厚野是濡倉箱是粒與書所云岷嶓既藝沱潛既道者有同功焉爰建福地聿崇仙館旌哲人之餘烈慰生民之報德固其宜矣伉嘗覽

覽舊史燦然神迹式將王命躬率僦功歷載維三周視其間堂廡湫隘命芟草以廣其址積石以增其注遷舊宇之翳蒼卽孤山之顯敞洪流壁轉列峯屏合東臨江口之關故靈基立其左崇功之義也西瞻寶室之穴故僊亭峙其右思道之旨也正居太上之殿中築朝眞之壇喬木蔽乎陽岑奔流激乎陰壑石頭虎踞之壯蓬邱鼇觀之奇呂梁懸仞之儉吳濤逆奔之勢羅列在目殆非人世之景象與且猛嘯虎於谷風元鶴鳴於浦月白雲生坐上拂仙香彩霧依巖下傳天樂氣象萬千更僕難盡焉方今聖上凝命穹昊躋人福壽訪道以清中夏軒轅氏之理也望秩以徧羣神有虞氏之勤也茲地也名山周映靈跡孤標僉移集道之宮尊爲逆釐之府事非改作功無用勞不革舊名惟崇新宇經構輪奐之狀助揚穆清之化眞風奇蹟等天地久不亦盛乎不亦永乎拂石刻銘於彼山趾其辭曰李公英英日貫其誠奇功美利於

灌志文徵

卷二 碑誌上

四

今有靈仙鳧屹峙元都景明壇殿新製門闔舊名江沱泚泚揚漣玉清岷山峨峨回風雪零桂菌朝蔚漪瀾夜渟乘雲嘯歌浮邱赤城

蜀堰碑

揭傒斯

江水出蜀西南徼外東至於岷山而禹導之秦孝文王時蜀郡守李冰鑿離堆分其江以灌川蜀以饒自秦歷千數百年所在衝薄蕩囓大爲民害有司歲治堤防百三十二所役兵民多者萬餘人少者千人其下猶數百人每人七十日不及七十日雖事治不得休息其不役者日三緡富屈於貧貧屈於力上下交病會其歲費不下七萬緡毫髮出於民十九耗於吏概其所入不足以更費今上皇帝卽位之明年僉四川廉訪司事吉當普巡行周視得要害之處三十有二餘悉罷之且召灌州判官張宏計曰若甃之石則役可罷民蘇弊除何憚而莫之爲宏曰公慮及此生民之福國家之幸萬世之

利也宏遂請出私錢試以小堰堰成水暴漲堰不動乃具文書會行省及邊軍七翼之長郡縣守宰鄉遂之老各陳便宜皆曰便復禱於冰祠與神約昔鑿離堆以富川蜀建萬世之神功也今水失其道民失其利吏乘其弊若此而神弗之救是神之惠弗終也神克相予於治弗予相請與神從事卜之吉於是徵功發徒以至元改元十有一月朔肇事於都江堰都江即禹所鑿之處分水之源也鹽井關據其西南江南北皆東行北舊無江冰鑿以避沫水之害中爲都江堰少東爲大小釣魚磯又東跨二江爲石門以節北江之水又東爲利民臺臺之東南爲侍郎楊柳二堰其水自離堆分流入於南江南江東至鹿角又東至金馬口又東過大安橋入於成都俗稱大皂江江之正源也北江少東爲虎頭山爲門雞臺臺有水則尺爲之畫凡十有一水及其九則民喜過則憂沒其則則困乃書深淘灘低作堰六言於其旁爲治水之

灌志文徵

卷三 碑誌上

五

法皆冰所爲也又東爲離堆又東過浚步雲雲二橋又東至三泊洞醜爲二渠其一自白馬騎東流過郫縣入於成都謂之內江今府江是也其一自三泊洞北流過將軍橋又北過四石洞折而東流過新繁入於成都謂之外江卽冰所穿二江也南江自利民臺有支流東南出萬工堰又東爲駱駝又東爲確石繞青城而東鹿角之北涯有渠曰馬壩東流至成都入於南江渠東行二十餘里水決其南涯四十有九歲疲民力以塞之乃自其北涯鑿二渠與楊柳渠合東行數十里復與馬壩渠會而渠始安流自金馬口之西鑿二渠合金馬渠東南入新津罷藍淀黃水千金白水新興至三利十二堰北江三泊洞之東爲外應顏上五斗諸堰外應顏上之水皆東北流入於外江五斗之水南入於馬壩渠皆內江一支流也外江東至崇甯亦爲萬工堰堰之支流自北而東爲三十六洞過清白堰東入於彭漢之間而清白堰水潰於

南涯延袤二里餘有司因潰以爲堰壞乃疏其北涯舊渠直流而東罷其堰及三十六洞之役嘉定之青神有堰曰鴻化則授成於長吏使底其功應期而畢若成都之九里堤崇寧之萬工堰彭之壩口豐潤千江石洞濟民羅江馬脚諸堰工未施者亦責長吏農隙爲之諸堰都江及利民臺之役最大侍郎楊柳外應顏上五陡次之鹿角萬工駱駝確石三利又次之而都江又居大江中流故以鉄萬六千觔鑄爲大龜貫以鉄柱而鎖其源以捍其浮槎然後即工諸堰皆甃以山石籠鉄以關其中取桐實之油刀麻爲絲和石之灰以葺罅漏禦水潦岸善崩者密築江石以護之上植楊柳旁種蔓荊櫛比鱗次賴以爲固蓋以數百萬計所至或疏舊渠而導其流以節民力或鑿新渠而殺其勢以益民用遇水之會則爲石門以時啟閉而蓄洩之凡智力所及無不爲也先是郡縣及兵家共掌都江之政延祐七年其兵官奏請獨任郡

灌志文徵

卷三 碑誌上

六

縣乃以其民分治下流諸堰廣其增修而大其役民苦之至是復合焉常歲蓄水之用僅數月堰輒壞今雖緣渠所置確嶼紡績之處以千萬數四時流轉而無窮甚便都江水深廣莫可測忽有一大洲湧出其西南方可數里人得用事其間入山伐石崩石以滿隨取而足用所在皆然蜀故多雨雪自初役至功畢無雨雪故力省而功倍民不知勞若有相之者亦其忠誠所感如此致使天子賜酒之使相望於道臺省觀工之檄不絕於使所漑六州十二縣之民咸歌舞焉而下自郡縣上自藩部惡其害已且疾且怨或決三洞之水以灌其坎或毀都江之石以壞其成撓之百計不拔益固甫五越月大功告成百一恆費民永休享古未有也而吉當普會以監察御史召省臺上其功詔臣僉斯記之於碑臣聞水先五行食首八政九疇之敍其次可觀矣夫水者衣食之源然所以爲利亦所以爲害在善導之而已禹平水土猶已溺

之后稷播種猶已飢之萬世有稱焉是故爲政不本於農不先於水是爲不知務是謂冥行之臣李冰一鑿離堆民受其賜吉當普一修其業神且不違彼失其利而欲廢之不亦悲乎惟吉當普才大而德敏愛深而知遠不枉其道不屈其志臨難忘身爲國忘家安於命而勇於義而知所先務故事可立而功可建其在四川請罷鹽運司正鹽井之法以去奸利置安撫司以撫四方流寓之民使安其耕鑿及居臺端知無不言言無不合誠國之寶也判官張宏碑智竭慮終始克相其志雖百折而不悔亦今之賢有司乎是役也石工金工皆七百人水工二百五十三人徒三千九百人而邊軍居其二工糧爲石千有奇石之材取於山者百萬有奇石之灰以舂計六萬有奇油半之鉄六萬五千舂麻五千撮其工之植物之價以緡計四萬九千有奇皆出於民之所積而在官者餘二十萬一千八百緡責灌守以貸於民歲取其息以

灌志文徵

卷二 碑誌上

七

備祭祀若洵灘修堰之供仍蠲灌之兵民常所繇役以專其堰事嗚呼後之蒞此土者尙永監於斯勿怠其政墮其事以爲民病以爲國家憂臣拜手稽首而作頌曰天一濬靈多源於西岷山導江禹績可稽民生之初惟水利賴夫旣利之胡忍貽害運有推遷事有因革保制安危神實任責於穆英惠藩屏坤維於赫仁祐駿烈四馳自秦徂漢襍以千計維王父子蜀境是庇江源自蜀王鑿其阻蜀漑餘波厥施乃溥江趨而東勢通蜀山春夏暴漲橫潰是閑旣遏其衝又決其支以漫以灌惟堰是資昔王受命司我芻牧爲茲惠利以阜我蜀今我蜀民作堰歲勞殫智疲力以捍江濤僉憲有謀將息斯患王實誘之旨遺以艱吏籲於王願受指教王繇之詞繼導之琰詢謀允孚百役以興厥志無二惟王之憑象鼻之漲茫無津涯湧爲淺瀨有礫有沙匠陟彼巘言鑿其堅山夜發洪穴不得穿匠取彼石旣磊旣砢揮椎運斤惟右惟左

蜀山不雲蜀日且出陟冬屆春民就愛日彼樾彼菑昔木今石其崇言言永固爾孺民聽馨鼓追思往年富民醵錢耕者廢田今茲永逸孰究我圖顯允二神作我蜀鄂聖神在御懷柔百神封章屢上亟命司臣錫以徽稱華以欽命以旌王功以致皇敬煥號於庭揭虔於祠帝命不廢神惟顯思登瀛有臣復請詠賜命旨自天寵命薦至嗟彼羸氏百郡列署惟茲蜀守勳烈昭著異趨殊歸惟德與力王初庇民顧盡乃職豈謂異世猶濯厥靈俾王初志炳乎丹青王不持力務德是勤有偉斯績益光前聞詞臣作歌守吏賦刻江流法泐昭彼無極

迎祥寺碑

明嘉靖戊午年

陳節

灌志稱邑東南二十里有寺曰迎祥舊隸導江廢縣考寺斷碑所載大唐麟德元年勾刻惜不見其文則知寺創於唐久矣其東三百步有楊妃池志引

灌志文徵

卷二 碑誌上

八

太真外傳妃父玄琰爲蜀州司戶妃生于蜀誤墮其中因名後一高阜乃妃梳洗樓遺址一寺兩院左曰金祥右曰銀祥後合名爲迎祥周圍延袤幾四里甚爽塏當時遭兵燹之厄其沒地石礎器玩謂皆妃所遺容或有之雖迹蕪而名存然固永康勝概也昔名公巨卿若狀元楊公侍郎黃公皆慕蹟忘勞而尋覽滌襟於此焉且寺廢興不常在宋有林遠禪師我朝初有興古道禪師皆以苦行住錫而大覺慧松壽堂亦由是披剝以繼之迄宏治戊午年僧海楫獨募重修然規制尙未大也相沿歲久椽瓦剝落上漏下濕棟柱幾不可以支嘉靖乙卯春僧相桂深用惻然決以更新自任謀之陳子亦弗忍愒置卽手授疏相桂不畏羣疑稟縣印記會鄰里之同志者持疏以募捐費者無慮數十百人大家牛車小家肩負不數月而落成卑者益崇隘者益廣未備者以完美築垣墉甃石級制度煥然一新視昔雄偉謀雖以人而功若

神相矣是役也高厚若干闊大若干爲日若干銀以兩計者若干糧以石計者若干木以章計竹以箇計灰釘以斤計甃甃以數計者各若干士民咸稱嘆曰百五十餘年以來不圖今日睹構建之盛如此謂非僧行素孚人心昭格神意能若是哉相金猶慮無以示後請伐石以記垂諸久遠再謀於陳子陳子曰有縣則有寺制也况迎祥寺自唐迄今世之相去遠矣自太真以及名公巨卿其見重當日而後世湮沒無聞者視此何如耶今桂子首圖以倡之金子協志以繼之二僧相與有成洵溜流之賢者也後之視今孰不以爲林遠興古道哉

新作蜀守李公祠碑

阮朝東

嘉靖十有二年冬蜀府新作秦守李公祠於灌崇明祀報功也按志公守蜀殫心民事時沫水爲災乃與厥子二郎鑿離堆以泄之治都江諸堰導水以

灌志文徵

卷二 碑誌上

九

溉郡邑田疇民無水災亦不憂旱迄今千七百餘年遺法猶存而惠澤甚溥蜀人所以世祀也祠昉於隋至元始封王以示褒崇舊祠壞民圖新之將歛財灌令張紀聞之曰嗟茲祀也吾有司所宜圖也未可以勞我疲民以告觀察於彥杲彥杲重其役因屬左史高鵬右史張玠以告於王王曰嗟茲祀也吾有國所宜圖也未可以遺於有司夫有司不忍勞民予焉忍勞之矧成秩無文實我聖天子彝典惟李公冰有懋功於蜀茲祀弗新無以報功亦非所以祇奉德意也其新之乃命中貴陶宣暨甯儀周琦張璐圖興役以張繁張鑑督工其祠宇以間計正殿五寢殿三羣祀堂一十有二左右廊二十有八碑亭二祠後有臺祠前左右有坊殿制高廣且深輪焉奐焉壯麗倍昔是年冬十有一月哉生明經始十三年夏月朔落成初工之興也人咸難之謂匪期月可成繼而人樂趨事未幾工畢人咸異之曰是何成功之易耶人謀厥

藏而神實相之也不然何若是易紀告於東且請記東曰嗟聖王之制祀也能禦災捍患則祀之夫祀以報功以昭勸也李公功允懋矣茲祀之新也固宜書曰岷山導江惟茲岷江實惟禹績禹之澤在天下冰之澤在蜀蜀人思冰不異於思禹也自是厥後治蜀者能如冰焉人其不思乎抑予聞智者作法愚者因之李公之遺法曰深淘灘低作堰善矣人恒因焉世世利也夫濬其難以導水勿使不足低其坊以洩水勿使有餘其坊也基以巨石其上暨傍築石而聯砌之石取諸灘歲一修治民不告勞而自獲其利後世乃有好事者謂歲一修治之煩始廢竹篾更砌巨石以爲坊所費不貲春夏波濤衝擊浮木震撼不二三年輒墮焉則費而患不免元之吉當普建文時胡光往轍可鑑已夫巨石不易致也即可恃焉爲固亦不免歲一濬灘况不足恃乎乃若篾石其相聯多則力重且能泄水不與水敵誠固而可恃而彼以石易篾者可謂智乎吾懼夫好事者猶執前說以勞民傷財故併及之以告來者

灌志文徵

卷三 碑誌上

十

重修灌口二郎神祠碑

范時倣

按地志江水發源岷山山之下即灌口此其濫觴也昔者禹抑洪水導江而患始息然灌溉之利尙未興焉秦蜀守李冰鑿離堆然後沃野千里號稱陸海考厥成功實其子二郎以神力佐之也詩曰粒我蒸民莫匪爾極民思其德神其功而不敢名故直以其行稱之立祠徧境內歷代因之遂封爲川主崇仁之神粵稽祀典能捍大患則祀之有功於民則祀之夫自離堆之鑿也沿江而下堤堰曲防當春水發時盈科而後進原濕均沾灌溉饒洽水勢既殺江流易泄抵秋稼登江亦漸涸斯民乃粒巍巍神智成父之仁所謂捍大患而有功者以一方計之當不在禹下矣然則典厥祀民用欣哉灌口舊有祠燬於火蜀王爲民軫念焉出內帑重建之命承奉蜜儀周琦主其事乃殫

心發慮益宏厥規暨承奉張璐相與經畫曲盡其制務稱上意先承奉周宣陶宣又皆捐奉以助之于是發木於山鑿石於岩工匠夫役悉出雇募民願施費者聽未嘗借助有司以故財不知費役不告勞而廟制聿新殿寢門廡垣墉遙觀厥成蓋孔安矣詩曰萬民是若斯役有焉工始嘉靖癸巳之冬甲午之秋卽告成其采繪華飾越歲庚子始大備事竣宜刻石以紀乃命諸倣倣嘗病史失載神名且沒其功恒嘆惜焉覩茲曠典樂爲之書因併記之以告後之司民牧者

增修清涼寺碑

齊準

灌友羅白龍氏與余交垂二十餘年外世味以自適者昔嘗屬予曰倣邑多佳山水治南五十里許舊有清涼寺南望錦城西眺岷阜瑞靄蒼煙滿目萬狀亦蜀中古刹也士大夫結駟來遊青城者率憩息焉落成久矣苦無言以

灌志文徵

卷二 碑誌上

十一

誌恐不旋踵而跡沒將不可復尋幸爲記之余雖諾而奪於事未有以應也今年春白龍氏與僧速記余乃詔之曰凡寺以祝皇釐亦以普慈訓是雖僧寓若果有關興作君子何愛於言灌有清涼寺余亦與聞之按狀灌治在元爲州入國朝改縣而清涼寺仍舊名寺建自宋嘉定間世久傾圮莫由考證止存鐵雲版僅可識歲月云永樂間有善士郭朝宗者修建佛舍招僧行偉住持且割田以充常費後百餘年明善徒智超善治生則又朝宗之元孫也見事不治亦率祖攸行重建覺皇大殿天主祖師二殿左右廊房若干楹地以石漫繚以周垣而四方檀越往往佐之以故梵宮壯麗佛像莊嚴規制奮越於前而超示寂矣又數十年其徒惠寧惠恩復增建法堂羅漢鐘樓更集緣倡募修無漏學且感召隣寺禪僧通藏典規上乘亦欲置蘭若如遠公之流則又一鉢相傳所致也其締構之由如此雖然六祖家風寂靜爲本真空

妙有無像無生清涼宮殿也爾僧衆若能了悟以定其心以要其終庶無忝於六祖之體惟在一念寂靜主之別無聖解也否則金碧虛輝本之則亡矣如余爲記與羅白龍氏之索記何恩僧曰諾遂記之

永續菴碑明天啓五年

陳所尙

吾鄉耆碩陳公維與妻吳氏爲人謹厚善治生而艱于子嗣一日念曰吾夫婦承祖宗千百年之緒今忽斬焉盍謀所以不朽者乃捐資構廟卜基于宅東百步許佛像森肅金碧交輝左右植松柏俾萬年常青仍置田招僧住持什物備具公與余契乞言以傳之詩不云乎君子有穀貽孫子孫子相繼猶有賢不肖世業未必永續此菴旣建異世睹鐘簾之在懸撫喬木之蒼鬱與夫碑銘之秩秩窄隘者必思有以恢弘之腐舊者必思有以鮮明之廢墜者必思有以鼎新之則公此舉有得于續之義而繼是興起者將永續之無紀

灌志文徵

卷三 碑誌上

十二

極也有穀以貽孫子公有之矣因號曰永續菴傳語鄉鄰如有侵害者覆宗絕嗣

御史劉公大修都江堰碑

陳演

今金氣爲沴壘多兵覲外備內備寇胥席卷於巡方使者各加以監軍之號巡方使者精神幹理大半注意吾蜀邇者劍閣弛險流氛闖入繼以民譁杜鵑之有無幾不可問靡天子西南顧特簡劉公持繡斧按部乃公之精神幹理有異焉獨注意民謂民窮是以軍興弭軍宜先奠民凡一切可爲民隄害而幅利者靡弗彈慮而畢營之下車卽禁金根子弟虎而翼者乘傳胥役狐而假者高隅奧窟每爲破柱蔀屋荒閭咸蒙光燭而於激揚特慎譽知阿毀知即墨無悶抑焉無假易焉而其緒乃畢見於都江堰一役夫水天下之大利大害也都江實爲岷源禹濬溷崖疏其湍壅之害是以朝宗於海秦守李

冰鑿離堆藉爲灌溉之利是以沃野千里稱陸海焉冰之功不在禹下蜀人尸而祝之有以也其有堰也自冰防也嗣是陵夷或修或湮至於今湮久矣灌郫等七縣之民每春初具畚畚芻芟瀹排無何卽漲決矣未享其澤旋受其鬻嗷嗷兼苦旱澇焉公廉知其苦慨然聚監司守令而謀或曰費不貲惟守西陳公毅然任焉遂謀定以壬午年良月之望鳩僦迄癸未孟陬之杪卽已事而竣課能授粲役無厲詘僭程功器無竄費不貲公皆括捐語云愚公移山精衛填海誠一所致僅四閱月耳亟襄久湮之墜緒豈有神靈呵護耶抑公誠一所致也計惟時流輸七州縣萬畝千澮汪汪焉不舍晝夜緣南畝者不抱甕不祝芻龍坐受介我黍稷之賜賜者誰也謝安石以履屐得所識阿立是役也又不啻履屐矣夫水天下之大利大害也隄其害斯福其利惠及七州縣者公之緒也民亦天下之大利大害也苟善幅之卽梗者譎者且

灌志文徵

卷二 碑誌上

十三

頽首歸功於我誰敢肆螫焉凡惠及全蜀惠及天下亦若是則已矣蓋水者金之子也子乘權則母謝事從此其不爲珍乎挽都江堰以洗介兵其亦可也易曰地中有水師君子以容民畜衆振水歸地咸茂桑林甘稼穡焉則民容而衆畜師之道莫大乎是苗民逆命禹徂征舞干羽于兩階七旬有苗格夫亦猶以岷山導江之道行之也公持此道以報當宇何憂寇乎天子必曰俞汝其褒大禹功維時懋哉昔杜預南征紀功勒二碣一在禹山上一在禹山下夫南征之功與禹山何與而幾幸於陵谷乎若夫功在都江志碣於都江宜也不佞受廛武陽雖距七州縣而遙然食隄害幅利之賜一也舍人郵其事於揆邸恍悟公焉可無一言以記其辭曰滋其潤險者可祛藉以斷廢者可苴都江堰鄭伯渠

復濬離堆碑

杭 愛

國以民爲本民以食爲天古誌之矣故重農乃爲政之首務力耕寔兆庶之良謀漢之文景躋斯民於仁壽由此道也但勤惰之事存乎人豐歉之數繫乎天或旱亢之靡常雨暘之弗若桑林徬徨大聖且不能與造化爭衡則水利之以人事奪天工其術甚神而其德誠厚耳益州古稱沃野千里自禹導岷江人得平土而塘堰未開至秦蜀守李公冰者命其子二郎鑿離堆山剏渠引水灌溉十一州縣之田疇名都江堰爲萬世利厥功不在禹下是後則有元至元間廉訪僉事吉當普建白用石包砌諸堰爲石門以時啓閉前明成化間巡撫都御史夏公墳規畫均役修堰之法始備迄宏治間灌令胡光伐石冶金卽舊址甃石砌貫以鉄柱克障水決正德間水利僉事盧翊躬督疏濬直抵鉄板得秦人所書六字訣曰深灘淘低作堰大書觀瀾亭用昭永鑒載在輿志班班可考皆踵事而增功者也大清康熙二十載歲辛酉余欽

灌志文徵

卷三 碑誌上

十四

承簡命撫綏全蜀值吳逆變亂之後大師進勦之時貔貅數十萬餼糧於斯取給經營籌畫日無甯晷且伊時伏莽未靖備禦時嚴而余念切痾瘵問民疾苦探察利弊首以都江堰爲急務蓋錦官爲省會之地商賈輻輳軍旅交馳食指浩繁咸取足於閭閻之胼胝食重則農重農重則水利重水利重則堰重誠不敢因軍興旁午之際而緩視根本之圖也爰檄藩司劉君顯第臬司胡君昇猷先事商度諮諏計慮俱有同心聞此堰廢馳已久往歲脩築僅以草率應事故有歷三春而水不至田農人懸耒太息者遂於是歲孟春發帑金四百遴委通判劉用瑞遊擊鍾聲往求離堆古蹟而疏濬之比至果於榛莽中得離堆舊渠砂石壅淤久矣蓋歷年堰水惟從寶瓶口旁出非離堆故道也禹之治水行所無事李冰豈獨不然違其道而治之毋怪乎用力艱而決防屢告耳今仍循古蹟事半功倍仲春之初水澤盈畦決裂無聞民

得耕稼以有秋官吏相與慶於庭士農相與歌於野咸曰一勞永逸吾人其無阻飢之患矣而余則藉二三子之力庶幾俯愜輿情仰答天眷盈百室而甯婦子慰余惓惓重農之意也稽諸祀典記曰法施於民則祀之能禦大災捍大患則祀之李公誠其人祀不可以不崇是用遣官致祭以報功德仍勒石以記其事俾後之君子知民事之不可緩而此堰之疏濬在法古而毋忽斯民其永賴乎

香樂寺碑

清乾隆四十四年

任遜

灌東二十里有香樂寺焉肇自前明兵燹之後銅駝荆棘康熙十年僧照徹飛錫至此乃發菩提心重修殿宇經載無倦創造之績偉哉夫莫爲之前雖美弗彰莫爲之後雖盛弗傳雍正間僧宗裔紹繼衣鉢大振宗風力加恢拓煥然改觀然積債寢多產幾不保西竺遺徽替矣幸有法正者繼承墜緒漸

灌志文徵

卷三 碑誌上

十五

積多金於債則償之於田則贖之鳩工庇材丹楹刻桷寶殿森列既麗且崇洵盤龍之名山導江之寶刹矣工程告竣泐石紀績遣徒問記於余余與僧交最久於寺之本末能言之故述焉以誥來者

重修酆都廟樂樓碑

孟文治

夫崇德報功首重祀典宣和樂豫用振元音國家既有隆文章野咸欽雅化誰甘簡陋馴致聲銷跡滅哉灌東酆都廟古刹也樂樓傾圯不足以格神人而和上下衆議新之都人士來觀者皆曰飛閣流丹何容不記余曰歌傳雅頌舞用干羽以通神明之德以類萬物之情此古之樂也若猶是梨園子弟優孟衣冠直遊戲耳然不妨莊論焉今夫易俗移風端在司牧彰善癉惡實賴鬼神斯樓之建也因時報賽如登春台則所以激發忠臣孝子之心曲成義夫節婦之行者將於觀感得之亦庶幾有合於司牧之意鬼神之隱也

善爰勒貞珉俾垂久遠

重修通佑王殿碑

清乾隆五年

朱介圭

昔神禹導岷江抑洪水而功在天下厥後李公鑿離堆資灌溉而功在梁州事之大小雖殊而人溺已溺人饑已饑則先後同揆也李公諱冰爲秦蜀郡守殫力民生見江水洶涌泛濫時虞乃經營相度創築都江堰以分其勢溉成都十一州縣之田澇有洩旱有蓄沃野千里轉害爲利洵所謂天府矣蓋其時李公持籌擘畫而公之子更以神力佐之卽俗所稱二郎者也民懷其德永世勿替建廟於玉壘山陽春秋俎豆歷代尊崇傳所謂有功德於民則祀之者迄今二千餘年利濟羣生共天壤而不敝岩下豐碑屹立上鐫六字曰深淘灘低作堰傳爲後世法焉壬子歲大憲題請蒙俞旨勅封公爲敷澤通佑王二郎爲廣惠顯英王誠曠典也制軍黃公復倡率捐助重修顯英王

灌志文徵

卷三 碑誌上

十六

前殿及兩廡牌坊輪焉奐焉神所憑依其在是矣時余爲茂州牧因公往來必登臨瞻仰道人告余曰事有爲之主者有爲之輔者離堆鑿而澤被無窮公主之而二郎輔之父子同功一體殿庭應與相侔今乃前新後舊殆非所以肅觀瞻而妥神靈也若能募集並將後殿新之惟住持是賴余嘉其志之堅而意之確也率以鹿鹿風塵馳驅鞅掌未遑觀厥成越二年余量移成都郡丞職專水利下車始伊齋虔往祭則見後殿巍峨壯麗與前殿相映大異於昔是亦道人募化之勤哉要以神靈功德越千百禩而不朽者自深入乎人心也工既竣宜勒貞珉垂諸永久道人復請於余敬誌本未夫解囊啟橐多寡爲均此道人之不泯人善也誠心協助趨事赴功此紳耆之急公好義也仰迓神庥督我不貸此余之夙夜惟寅者未嘗不念茲在茲也若夫時際昇平余以菲葑得因時而宣上德又未始不自慶其遭逢而彌歎公之澤及

萬世與大禹之平成共戴也道人與善信皆例得列名於碑以風勵後來者

重修文廟碑

乾隆乙巳年

林 鐫

郡國有學學有廟皆自蜀始漢文翁爲蜀郡守立學校作禮殿是矣而翁又穿湔堰以溉灌繁田一千七百頃蓋富而後教益興則於灌嘗致意焉據志言灌文廟於五代時始建至明正德中提學僉事劉節知縣胡光乃增修之及獻逆亂廟爲之毀我朝定鼎右文崇學前邑令馬君璣首建大成殿其後黃君俞聶君有吾譚君璉陳君涑踵而增之然後戟門東西廡崇聖祠明倫堂及鄉賢名宦節孝祠皆備蓋歷數十年之久藉三四君之力而始得觀厥成迄今又五十餘年矣且夫唐宋之記學記立學也今之記學則記修學也立者一爲而已耳修者相續以至於無窮記曰有其舉之莫敢廢也而况學乎今夫土者圯木者朽石者剝泐而倡導無人捐輸不繼車服禮器幾幾乎

灌志文徵

卷三 碑誌上

十七

有委諸榛莽之傷顧不慨歟今邑令孫君以才賢調任茲土謀所以新之進邑之人而議之邑之人感君之崇學校以作育人材也莫不踴躍爭先以襄其事於是稽象而考度庀材以就工鞏乎其質煥乎其文孫君率羣士而釋菜焉禮成之次憑高而望青城鬱其深秀江沱肆其汪洋蓋隱然有崇德廣業之助焉而其前沃壤彌綿旁連郡邑則湔邠之所灌輸也余有職於是嘗以時至與孫君講求堰右檢左因山頽水坐致竹木諸務而孫君以身任地方實力爲之水利較昔且倍亦既有以富民矣今君復能倡率其民大修學廟而民皆樂於趨事以應其上於以知長吏教養所及民日鼓舞於飲和食德禮義自治之中倡之者不勞而爲之者易集庶幾有文翁之風乎余故樂得而記之且使後之來者覽其作述之由不有創者誰基其始不有繼者誰永其成勤垣墉而塗丹雘以傳之於勿替也廟經始於戊戌季冬落成於乙

已首夏捐貲而董理者邑紳士等例得並書

重修文廟碑

孫天寧

古之教者家有塾黨有庠術有序國有學誠以教也者人心之本風俗之原而學也者又所以端人心風俗之地也孔子之道冠百王垂萬世非名言所能罄亦非俎豆所能酬然太史公適魯以觀仲尼廟堂車服禮器慨然興向往之思可以徵感發必有藉矣且夫前事不忘後世之師也蜀自司馬贊畫始闢蠶叢繼而堰都江衣食開禮義之先繼而建講堂教化嚴飽煖之弊易椎髻縱目之風躋文物聲名之美人皆曰庠序之設日文翁爲之倡而不知灌實有以啟之也自時厥後大道光昭異學熄滅哲王之崇奉日隆郡縣之建置愈廣我朝崇儒重道卓越前代設學建官徧於遐陬猶慮末學罔所遵循造道迄無定矩鴻章炳煥昭則寰區御製詩云志聖賢志終須立言孔孟

灌志文徵

卷三 碑誌上

十八

言大是難揭傳心之秘旨裨多士以楷模嗚呼盛矣以故灌雖僻介省右地接西夷而民俗樸茂人文蔚起賢豪輩出非以教育有素得所憑而然歟余初下車謁先聖廟見基址湫隘殿堂廊廡漸就傾圯赤白漫漶不鮮非所以妥神靈而肅觀瞻也意欲量移而更新之謀於學博暨紳士等議既合則捐貲庀材卜日鳩工營於治之西北稍遷而加廣焉經始於戊戌季冬落成於乙巳首夏凡所以規畫者舉如法工既竣余諭於衆曰諸君知吾維新之志乎夫體道者心也起敬者廟也心不體道則視聽言動皆失敬無所起則放僻邪侈易萌道以準心廟以作敬心存於內敬著於外內外交養德修罔覺矣夫而後居家則孝弟當官則盡忠此則朝廷立學之意亦余心所樂觀成者也若第俯岷江之浩渺挹青城之翠微忘秋實而擲春華固非余之所期要在二三子有以自勗也夫

重修太平橋碑

孫天寧

蓋聞無偏無黨共遵王道之平成杠成梁皆藉農民之力大道之有橋梁所以戢水勢便行人也灌邑東門外舊有太平橋東連省會西達邊隅車轍馬蹄晨昏絡繹肩挑背負來往紛紜實松茂成邨之衝要也歷年久遠大水冲刷日就傾圯行者殆之失今不治非特旅人病涉抑且後費不貲余忝膺民社凡屬修舉廢墜自應未雨綢繆覩斯橋之岌岌鳩工庀材是余責也惟計值甚繁程功匪易爰出一言告諸大衆今幸邑之紳士齊民同心俛助協力經營不兩月而工竣較前規增壯麗焉從此坦坦履道厲揭無聞不其盛歟余樂斯橋之煥然改觀而尤嘉我邑人之踴躍從公相與有成也因援筆爲之記至於隨時修葺無怠無忽垂以永久是所望於後之君子

重修城隍廟碑

孫天寧

灌志文徵

卷三 碑誌上

十九

自古府州郡縣各有守土固恃宰治於顯猶賴神贊乎幽維城與隍有所鎮而靈威攸寄禍淫福善無所私而賞罰咸彰輔德之稱由來尙矣神道之教豈徒然哉此所以義緣乎方社而祀典攸崇秩祀乎侯王而殿堂聿煥也灌邑青城標勝秘籙著洞天福地之奇岷岫觴源鄰封資田野水泉之利占九宮於仙室敞八景之偉觀龍蟠鳳逸之英效地靈以會萃樂業安居之盛仗神力以鞏持維城隍廟建自昔年棟宇巍峨地勢高而天鑿遠聲靈赫濯人心肅而神聽和星霜旣已屢易風雨難免飄搖此係閭邑之功非關一手之烈凡有補葺事應共勦爰有任持道人張來翁者聿興善念勃發誠心於乾隆四十七年庀材鳩工大興土木重建殿宇培修院臺惟以餘積支持稍藉募捐俛助精一心以圖畫歷三載而告成由是廟貌維新士庶蒙其庇廕神光丕顯昭格得所憑依享井里之齋明惟朝焚而夕獻振羣生之聾聵則暮

而晨鐘勤苦經營思得許茅之真訣虔心向道欲紹羅甯之清修雖未必理符淨一已窺奧秘之無窮亦庶幾識遠凡囂堪許俗緣之漸脫至若黃冠羽士丹邱道流步虛聲而參拜引胎息而修持漫厠無爲實深機慮河上姪女僅識黃金山裏羣羊難移白石適徵貪鄙徒事吝慳斯固予心之所嗔抑亦道人之所哂惟是廟產之稅租未盈乎百石昔年之常住無積乎分毫而來翁居是廟前後不啻三十年葺修業已經數次不煩衆力惟以獨肩非心契虛無而神遊太上者何以能此又且廣栽繁蔭力謹護持挺翠柏之千章鬱青杉之十畝靈旗乍轉吹來嶺上松風清磬時聞敲徹岩間竹月此則深林見鹿大歡騷士之懷古木舞鸞適合羽仙之韻也因爲詳其顛末備勒貞珉知閭邑之崇祀賴廟祝幸得其人俾後日之相承睹裨言凜以爲示行見祭受其福神牖其衷綠野萋犁安農圃而梗頑悉化青燈風雨歸庠序而道業

灌志文徵

卷三 碑誌上

二十

不歧余承乏斯邑歷年於茲差幸閭里風清還念金湯形固深維奠安之德實荷神庥欲酬保障之功宜隆廟宇嘉道人之與予有同志也於是乎書

白沙河新創導江橋碑

清乾隆二十年

劉應鼎

去灌城西十里曰白沙司司新奉裁捐而居民叢聚市肆如故司之西曰白沙河源出茂州西番北界受諸溪壑水奔馳數百里會岷江於司之前孔道則必渡此乃循岷江而上每歲冬水涸時始可爲橋橋卑而狹行者不便春水稍溢則去橋而從事於舟舟小水急競渡者衆恆有坐待之苦若夫夏漲滔天波濤洶湧其勢直吞岷江行旅往來莫敢窺視惟驛遞差使號令文檄事難刻緩則以長纜繫舟縮其末於岸之樹選健卒奮力鼓棹然後得達亦危甚矣邑侯秦君治灌之明年政通人和因詢於衆備知其故於是相度地勢約費計工創長橋以跨之首捐百金爲倡鹽茶商賈各繼其後而士民之

慕義好善樂施者咸攘臂以從乃選工師購大木惟杉與楠始克勝任採其巨者委積如山侯乃日履河濱親爲指畫若者可柱若者可梁若者爲副棟若者爲橫板柱長二丈許埋於河底者半梁之長短視乎橋洞北岸水急關其洞以通之梁取其長南岸水緩洞稍密焉梁用其短匪爲就材木亦所以順水性也洞凡有五柱列各四板厚及咫橋長百二尺有奇闊十有二尺肇功於乙亥初秋落成於丙子仲春輿馬徒步咸便利之侯乃自題曰導江橋紀其實也當是時長子君成爲成都司馬分駐於灌余適自黔來聞而嘉美之乃乘款段週覽其勝父老二三輩爲余述巔末且曰斯橋之創實殫侯心吾儕小人佩侯之德思勒貞珉永矢弗諼敢乞片言以昭懋績余因憶往者令梓潼時常從軍役督理糧運恒阻於此屈指幾三十年今一旦遽成坦途厥功偉矣宜乎感之者衆而誦之者真且切也是烏容以老邁不文辭爰走

灌志文徵

卷三 碑誌上

二十一

筆爲之記侯名宜稷字東生籍山西太原府太原縣由癸巳舉人揀發來川歷試諸劇邑皆有能聲其治灌也善政實多斯橋其一斑云爾

重建關廟碑

清雍正四年

譚璉

關侯自漢末殉國靈威所注淪肌浹髓雖愚夫婦咸敬畏焉故普天之下建祠瞻禮其感人者深矣雍正乙巳余奉簡命來宰是邦朔望謁祠見其廟貌巍峨面青城而帶岷水閱縣志所載其來已久而問諸遺老則兵燹之後無復有存前任聶公始董其事秦民袁明春等共勦厥成數十年來人烟集帙猶有古風雖賴賢君相撫字之力亦神靈有以保佑之也無何祝融肆虐復爲灰燼余方慮鳩工庀材之難未幾而秦民慕義輸財并力期年頓還舊觀顧而樂之邑民因請記勒石余乃以見諸志詢諸人者誌之俾吾民瞻仰德威思愚賤所以傾心之故則茲祠閱千秋萬歲不且與青城並峻岷水同流

哉

重建武廟碑 清道光二十四年

史致信

自古義烈英靈歷久彌彰者莫如漢壽亭侯奉勅建祀禮獨隆焉道光壬寅春予來守是邦敬謁武廟規模氣象備極宏深惟前偪通衢環門草舍不能豁然開朗擬擴而充之有志未逮也越三載甲辰恪將時祀廟祝以殿梁楹柱蠹蝕告爰邀駐防陳君共肩斯任以廣文王蓋臣募捐贊國學李烈施皓司會計紳耆曾廷陞張汝達董其事鳩工庀材起遷者數十戶造作者數百人鴟吻不崇罍鬲不鑿昭其樸也柱以梗柎棟以杞梓昭其堅也曲榭迴廊芬橈布翼昭其衛也三階重級碩礪綵繖昭其等也崇門對峙聳跨衝途昭其別也脂膠丹漆焜耀垣墉昭其文也伋中區以流覽其北則岡巒起伏蜿蜒游龍若脈絡之遠接靈岩焉西環玉疊青城聖母諸峯出沒隱見若神仙

灌志文徵

卷三 碑誌上

二十二

排雲之遙拱焉水出離堆奔濤雷吼前折而浪靜波恬若流帶之束其南焉東弼建福樓截江固氣若文筆高插雲天焉一山一水皆效靈於廟而畢獻其奇夫廟建於乾隆戊申歷今五十餘載春秋之祀饗軍民之灌獻往來商旅之仰瞻胥於是乎在方予規畫經始惟鮮克有終是懼陳君力任其難固爲籌策曾張兩董事自携資斧黽勉趨公越寒暑一週而告竣非邀默佑之靈其能安恬効職以建此宏模也哉予幸初願之克遂而衆善之不容沒也謹述顛末以永貞珉

重修通佑顯英王廟碑 清雍正十一年

黃廷桂

今天子御極之十有一年余總制全川時東作方興彌月不雨而堰水未下用是殷憂越陌度阡懸耒而嘆爰親詣灌口二王廟齋板致虔誓工致祝牲肥體潔以祈於神祀事甫畢堰水隨至百派分流灌畦溉畛旋又上天同雲

屏風伯召雨師電趨雷擊一雨三日既優既渥膏禾澤麥民乃悅懌及秋萬寶告成倉箱盈溢蓋神之福被茲土者千八百餘年矣隄其害幅其利有求必應捷如影響者若此國家釐正祀典尊以王爵封以通佑顯英之號猗歎懋哉無非賴神之庥加惠元元俾萬井盈寧無旱乾水溢之患其較五嶽之視三公四瀆之視諸侯禮且過之宜乎冥符默契既闔闢陰陽吐納風雨以呵護一方而國家懷柔百神之道洵若是其不爽也第廟貌雖尊規制未愜且歷年既久不無圯廢躬環周視有慊於心遂會同撫部院暨藩臬鎮協下至守令等官計費糾資爲謀而新之又檄莅斯土者分官董正於是甃人獻甃砲人輸石鍛人呈灰柞人伐木梓人審曲面勢凡百工役翕然競趨遂建正殿若干楹東西廡若干楹殿之前爲牌門又爲碑亭於殿之左右越數月而工告成於以崇德報功妥神靈而陳俎豆庶幾無負朝廷尊祀之大典而穰穰粒我蒸民兮地久天長

創建武廟碑

乾隆二十九年

顧汝修

學之有武也自開元始也其祀於學者爲太公望廟之有武也自我朝始也其祀於廟者爲關夫子中古以來弟子於長者掾屬於府公皆稱夫子特以致其宗仰之私自尼山正先師之位夫子之稱則由帝王以迄氓庶此其尊崇爲獨至矣國家於漢壽亭侯原列祀典職在太常牲牢將事以五月十三日今則春秋致祭海內并舉其度數視學校有隆殺而武廟與文廟固皆良有司所告虔者儼若春秋之後至漢季而有配焉夫文廟之在直省郡縣未

嘗有二而關廟則窮鄉委巷皆有之其在通都大邑者尤閎麗以故兩祀屆期禮無或缺而要其用心之因循非敬慎者所敢徇矣灌縣去成都百餘里向亦未有特廟乙酉春邑侯嘉公請於大府偕諸紳士度地城東創建之門廡殿寢庖福之室咸備繚以丹垣表以豐碑會公攝篆簡州張公來署縣事告竣而成都司馬汪公分駐茲土謀爲文勒之石汪公昔與余同官大理走書來乞文余維天地之用和風甘雨毒日嚴霜固並行而不悖者也吹拂濡養之澤萬物受之而不知至於蘊隆之酷粟烈之威婦孺亦相顧而不敢犯先師闡道立教人食其德吾見有親之而無畏之者其諸和風甘雨乎關夫子舍生取義蚩蚩者聞其名而屏息其諸毒日嚴霜乎知天地之不可偏廢而衡以人心知不虞其過量矣夫俗士或以其不足於文或以其大業未就陽爲尊崇而陰實少之此豈通人之識哉當鼎足未成時操挾天子之威孫

灌志文徵

卷三 碑誌上

二十四

席累世之詐倚以立名各有人傑夫子間關險阻封還魏賜拒絕吳婚周旋其間不撓不折此其精心毅力足奪奸雄之魄所謂聖人無厄地何以文爲卽以功論擒于禁斬龐德曹仁勢已不支而操將遷許昌避其銳向非糜方傅七仁之貳雖百陸遜呂蒙何能爲此蓋天不祚劉以致中蹶然千萬世後猶得以蜀漢與東西漢接武則又何恨之有夫諸葛丞相爲王佐才其視王朗華歆陳羣輩直如狐鼠而於夫子有絕羣逸倫之譽互相引重以此思之可無疑義矣余嘗讀夫子辭曹書曰日在天之上心在人之中日在天上普照萬方心在人中以表丹忱直揭心體千聖淵源如接往者奉天子命封安南王王以夫子廟聯請因本此義以夫子爲聖之任且清者夫其艱難擇主可不謂任乎絕魏拒吳可不謂清乎視聖之時亦其亞也汪公專司水利憂勤其職嘉公張公能不因循克盡守土之責以殫庸民之心皆聖人之徒也

既不獲辭齋戒越宿據其私衷後之尙論者其亦有採於余言夫

修建岷江書院碑

清乾隆二十八年

周 薰

古庠序學校之設所以正人心厚風俗誠法良而意美我國家文治光昭內有成均外自直省與郡縣莫不建修書院以爲興教化養人材之基乃窮鄉僻壤間阻於勢又或司牧者傳舍視之遂致因陋就簡名存而實亡灌縣書院之興久矣今邑侯嘉公調任灌陽下車伊始值水利城工方急欲鼎新之已而諸務稍竣邑人士以城東隙地告遂親臨按視度機宜正方位詳於上憲擇周生廷梁蔡生祚曾生思孔周生昌志董其事並捐俸以爲倡一時輿情歡忭鳩工庀材若寢若堂若廡舍若門牆木者石者圻者陶者百度咸集不累民間未期年而厥功告成顏曰岷江書院諸生乃造余而請序以余素識公用意之深也夫今之矜言吏治者大都以刑名錢穀簿書期會爲急務

灌志文徵

卷三 碑誌上

二十五

至於根本之地教化之原或視爲迂闊漠不動心惟公獨捲捲於此者非沽名也蓋將進諸生而勉於學也夫聖賢之學莫大乎忠孝莫切於仁義此實公所素期欲與師生朝夕講究以培植人材者今雖被劾歸里而規模畢具言猶在耳諸生肄習方務絕去紛紜馳逐勉爲明達體用之儒庶人心大正風俗益淳斯不負公之意而公之思遠慮深比德文翁直與岷山江水俱永後之沐浴歌詠仰止溯洄者又當如何哉

安瀾橋碑

馬光型

灌縣城西二里橫江駕索布板於其上名曰安瀾橋者嘉慶八年所新建也橋創自宋喪亂以來嘗設伏龍渡邑侯北平常公與士民捐置義田爲經費勒石離堆以誌願屢有覆溺之患歲以爲病壽民何先德素行好義疊呈縣署請修邑侯錢塘吳公乃與邑人捐建橋長九十四丈高七丈寬八尺緯索

十餘繫兩岸旁翼以闌厥功偉矣迄今十有五年長享安瀾無虞覆溺利亦溥哉義田歲入不數用仍派補葺今歲工鉅費絀乃請於署邑侯金華王公率衆復捐田增息爲善後計壽其事於石猶恐其功之久而就湮也邑人重以爲請侯允之命愚具詳始末蓋欲人之樂於爲善庶斯橋之可保歟

當首應差碑記

在土橋場

無名氏

夫急公奉上義在則然而困于役者傷于財譚大夫所以告病也我朝定鼎編保甲以安齊民約保花戶輪流充當法良意美願積久生弊貽累無窮妬富嫌貧亦所時有或規避差徭戶首墊貼或營私妄派中飽自肥每當年終歲首彼此交代弊竇滋多非所謂鷸蚌相爭漁人得利者哉况地丁雜項常平社倉當太平時已患不給重繭爲勞往者金匱之役台灣之徭與近日後藏大差破產傾家難以枚舉深可痛矣乾隆五十七年遵徐主諭編立里甲

灌志文徵

卷三 碑誌上

二十六

合縣皆然而朝陽一甲尤不可不計出萬全也合甲條糧共十三兩九錢三分八釐衆議僉同推定當首十人捐資置田以濟徭役歉則補之足則存之戶首與花戶痛癢相關休戚一體期於上不廢公下不累私勉作良民實由此道而大東之詩可不作矣謹將所議條規開列於左永存照焉

條規刻落字難盡識

重修常道觀碑

清嘉慶二十三年

王夢庚

常道觀者灌縣青城山之眞常道院也道書稱十大洞天青城次五山高三千六百丈屹然三十六峯羅列一百八景曰寶仙九室之天眞人甯封所棲止黃帝從問龍躡飛行之道封爲九岳丈人儲福定命眞君其言雖夸其事非盡無稽也漢末涪陵處士范寂者昭烈徵之不起封爲逍遙公得長生術因稱范長生晉元康中率數千人保居是山厥功偉焉廟爲碧落觀亦稱常道觀開元十二年玄宗手勅云蜀州青城先有常道觀所置原在青城山中

開有僧尊以爲寺勿令相侵觀還道家寺依山外舊所使道佛各有區分唐祖玄元皇帝宜其尊崇若是遐哉蔑以加矣張道陵亦修真於此旁有誓石青崖中斷龍穴乃不敢出水害稼下有白雲溪唐末杜光庭隱居處著述道藏最富尤爲道家所宗其他不可勝紀是誠羣真稅駕之奧壤幽人寄迹之靈區哉顧陵谷變遷壇宇頽廢其不湮沒於荒煙蔓草者幾希矣予以去秋權邑篆今夏偕友人一尋其勝求陸劍南詩所謂儲福丈人長生延慶諸觀題識皆渺不可得上清宮僅存小室三楹卑隘殊甚惟常道觀則唐勅古石巋然獨存殿宇廊廡高下其備殆鬼神呵護之靈留什一於千百爲名山福地特繇其祚耶第年久漸泐道人萬本圓銖積寸累募化十方踵而新之請一言以爲記予惟青城爲名山洞天之勝常道觀爲青城諸道院之勝唐勅丁寧誥誠如彼若不爲補葺完繕而聽其荒沒如名蹟何本圓此舉殊可與

灌志文徵

卷三 碑誌上

二十七

也因從其請而爲之記

修建太平堤碑

朱載震

成都府灌縣之都江堰其水源來自松潘之上流其利於民也成郫等九邑咸資灌溉昔人所稱陸海者也雖有歲修例要皆視爲故事塗飾一時康熙丙戌夏五月淫雨彌旬山水泛溢人字堤三泊洞府河口盡被衝決諸邑沿河之城郭廬舍田畝漂沒者災傷見告矣大中丞熊公惻然深念立捐俸貲委員詳驗多方撫恤無使失所繼又歎息言曰是特一時權宜事耳不可不爲一勞永逸計冬十月躬行相度計程三百里不殫勞瘁一日往返乃與僚屬從容商榷某處當修某處當濬瞭如指掌惟是工費繁多非千數百金不足以濟而民力民財又不可以重累也公於是首捐清俸以及藩臬兩司成都府屬用水九邑皆與焉復遴委別駕標員協力鳩工自一陽始生至次年

春仲凡三閱月築人字堤長三十八丈高八尺又於府河口三泊洞築新堤長八十三丈高八尺厚五丈支分條析水得復尋故道灌溉無遺民將世世食其利豈特一時慶安瀾已哉以故九邑之食租而衣稅者咸拜首而頌曰公之樂於創始孰如公仁公之洞悉源流孰如公智公之倡導捐輸孰如公義公之先時集事孰如公信嗟乎公撫蜀僅三年耳凡此十郡六州之人前所謂不便及今所願欲而不得者公皆爲之除弊而興利焉春生秋肅陽開陰閉令修於庭戶數日之間而人自得於河山千里之外今又軫念九邑黔黎遺樂利於無窮者如此公之功與流水同長矣是役也勞在社稷不可以不書

灌縣太平街修路碑

強望泰

灌爲蜀西關鍵商旅多取道於此而東關以通衢兼闔閭輪蹄駘駘行人塞

灌志文徵

卷三 碑誌上

二十八

塗踵相接肩相摩也古道已壞陰雨則泥深沒蹀行者病焉余見而愀然屢欲治理而力未之逮今年修堰既歲乃鳩工庀材自武廟至建福樓長二百二十丈中嵌石版兩旁甃以石凡寬丈許車輛旁行堅固可數十年不壞余日督工不敢憚勞費錢約三百緡皆廉俸所餘者將來有力更當於建福樓外續修數百丈以竟余志夫平易道路王政之一端也余飲蜀水愧於民無補而顧於是區區者爲之則亦行其心之所安云爾

重修灌縣三險石路碑

強望泰

灌縣西通金川出鎮夷關行四十餘里地曰三險左壁右崖路寬僅三尺故名行人至此輒目眩心悸稍有不戒墜則齋紛矣道光己丑冬余奉檄量移懋功經此駭然乃捐俸七十金闢之較前廣五尺餘殆韓昌黎所謂巧匠鑿山骨者耶壬辰春受代出山重經其地則畏途成坦道矣邑人七請勒石示

後以謂此地當平金川時一再修治越四十餘年未聞有過而惻然者茲幸履險如夷苟不豫告來者安知數十年後山溜石裂不又易安爲危耶此爲防患計非爲留名計也余憊其說遂磨崖誌之

新建通佑王廟碑

李芳

蜀中血食廟堂歷數千年不絕者在邛有鼈靈在巖有李冰俱能繼禹之績利及後世蜀望帝因龍戰水壅命鼈靈鑿巫山開三峽後禪以位稱叢帝龔都於邛民祀之三百年後秦併蜀以李冰爲郡守江水暴流民受其災冰乃通水道其子二郎佐之鑿山穿江溉田以萬計遷史班書並載之顧當日廟祀以二郎居正殿冰居後殿春秋報賽皆曰二王廟豈其子之賢過於父耶且歷代封爵由父以及子是二郎雖能成父之績李冰實主治水之功子不先父古有明訓况非跨竈者哉同治五年西川道鍾峻奉大府令將李冰神

灌志文徵

卷三 碑誌上

二十九

位改遷伏龍寺亦因功在離堆神以地而益靈也偃功旣畢胥蠶維新於是永昭明德焉考神仙綱鑑當時佐冰者七人如七聖姚光宮嵩古強趙元陽李意期徐佐卿俱宜配享論者以爲疑然過而去之寧過而存之

灌縣重修學宮碑

何煥然

天下有人心而後有風俗有教化而後有人心而教化之源有自開開之者先聖先聖之靈何以妥妥之者學宮人第知三代之學繇秦廢西蜀之學繇漢興天下之學由蜀始而不知灌實有以基之也今夫家無可食之粟欲一趨庠序而不能歲多可賴之費縱日親師友而不惜灌自秦守李公冰作堰以興水利霑溉遍十四州縣樂土相安數十世家給人足衣食旣開禮義之先春誦夏絃學校遂與井里並建故漢文帝時文翁於成都作禮殿景帝崇尙儒術遂命郡國皆立學此天下之學始於蜀而基於灌之所繇也然漢以

前學宮以周公爲先聖孔子爲先師開元中乃以孔子爲先聖先師加號文宣王自元迄於我朝文教昌明祀典大備春秋丁祭冠裳賸濟俎豆馨香焉灌縣舊壤秦時隸蜀郡季漢爲都安縣劉宋爲汶山郡隋唐以後沿革不一而鍾青城之靈毓岷江之秀文章忠義代有傳人玉壘龍津古稱名勝治之西北舊有學宮相傳建自五代時夫天下之學以灌基在秦與漢之交而灌學之修獨遲至五代時詎秦漢數百年後者蓋道無汗隆而時有升降也五代以來不知幾經興廢而今學之修則非楊公薌墀錢公少松柳公芷汀三明府之力不至此先是同治丙寅丁卯戊辰間三明府先後來守是邦政通人和百廢俱興惟茲學宮年久凋敝頽垣碎瓦委於長林豐草間三明府目擊心傷遂舉修廢之事而肩之是役也肇基於丙寅楊明府澂任之十月開工於丁卯錢明府下車之六月至於鳩工庇材增華踵盛則柳明府戊辰以

灌志文徵

卷三 碑誌上

三十一

后之力爲多焉夫灌之有學久矣而學之當修又非一日事矣顧天下人不在時則人待時而時不際人則時又待人嘗見通都大邑土沃民富官斯土者經營剏建飾粉山川序猶未更工已告竣胡以灌學之修十數年欲舉未舉至三明府而一旦舉之且一旦成之雖曰天時豈無人事哉行見教化隆而人心厚人心厚而風俗純孝子順孫之行不絕於書茂材異等之科遠軼乎古其處爲端士其出則爲名臣其農服先疇其士則食舊德三明府修學之效不少於文翁作禮殿之功也於戲此可謂知所先務者矣煥然濫竽其際用特書之以見天時人事之均非偶然云

甘雨亭碑

張思偉

甘雨和風生於天醴泉湛露出於地其澤物深入人速殆熙世禎祥而大造之所以陶鑄萬類者乎邑侯史公以名儒出宰歷任繁劇鳴琴而理相安無

事洵君子學道則愛人者也今歲春蒞任吾灌西陲綰轂徭役殷煩下車以來興利除弊改紆更張不喜事亦不畏事團練旣飭小醜潛蹤綱舉目張輿情懽洽古循吏不是過矣且灌邑水陸交衝路斃浮尸往往而有前任諸公必親勘驗此亦慎重人命之意顧不肖胥役每借以漁利今飭保甲勘明即埋有傷始驗夫馬酌減著爲定式惠政亦曠典也士民戴德勒石道周又恐風雨飄搖難以垂久爰設亭曰甘雨蓋昔人曾以喜雨名亭茲無雨而曰雨者以甘雨異常實與和風醴泉湛露同瑞宜志之用示來者

新建岷江書院碑

清道光三年

李桂林

灌縣爲山水之門戶青城丈人高插雲表都江沫水遠探星源三十六峯踞其雄一十六邑承其派藉地之靈生人斯傑乃考邑乘自宋遞明載核世家駢科簇甲古風已邈繼起無聞即或秋月揚輝人躡素樾香裏若問春風得

灌志文徵

卷三 碑誌上

三十一

意目斷紅杏枝頭豈玉筍班荆璞甘韜於山谷瑤池珍富隋珠轉匿於水濱歟不知文豹澤毛非藉南山之霧不足以發其爛熳也巨鯤鼓鬣非擁北海之濤不足以神其變化也鍾毓不擇夫地栽培一任諸天此山川所以秘奇而古今因之異轍余也通籍南宮謬廁木天清選備員西蜀久儀錦里仁風憶自受陶哲匠幾歷辛勤敢言承乏衝區遂忘申謹故修書院建奎閣培文峯山城斗大放文翁講學之堂復置學田增膏火購書籍官閣風清禮高默談經之帳羅江九載少慰此心灌口重來曷遑他務重修岷江書院之舉用是棘焉訪其創始爲乾隆二十八年相其陰陽在縣郭東南隙地居雜傭丁歲經花甲穿蟲穴鼠空存廣廈之名上兩旁風實倍荒齋之陋然使焚膏繼晷無頃斷帶以續燈伏案窮經弗慮薪珠而炊玉則片椽屏轍容膝易安三餘下帷會心何遠何意杜工部之老屋旣常懼其飄颻而且范文正之寒

壑更莫供於朝夕蓋歲租所入脩脯之剩無多月試有需獎賞之資亦歎余因亟分鶴俸廣集狐裘此邦之人爲善最樂於是舍其舊而新是圖尤喜事雖半而功則倍避厥塵囂卜茲軒爽刻期增飾蠲吉落成崇墉峻宇象騰蛟起鳳之基淨几明窗聚挖雅揚風之彥生徒既免乎露處薪水宜助以膏腴用加負郭之田倍增上舍之餼每月第其高下自今立爲章程赤文綠字行將貯秘笈於嬾嬛丹鳳白麟好待貢奇才於天府於戲學純則正宜懷鹿洞之箴規志大非夸須媿龍門之品望此時山水儲英或轉笑宋荒明陋他日文章報國當不徒屈艷班香爰集襄成之右族壽以貞珉卽將經始之弁言操爲左券

新建慰農亭碑

道光十五年

強望泰

灌口都江堰爲蜀郡水利所關修治之術自元明以來冶金貫石各拓新機

灌志文徵

卷三 碑誌上

三十二

要惟秦李守六言可行百世而無弊予自道光七年蒞任承辦堰工歷經四載親督夫役如法淘修而寶瓶口爲咽喉要地故致力尤深每歲自清明至處暑各邑農民望澤孔殷予亦懸念直至秋成始稍安貼竊幸農時無失得免愆尤雖神實佑之或亦恪遵古法之驗歟近縣城南距離堆二十五丈許有地一區方廣約十餘丈皆數年深淘沙石所積而成者乙未孟冬余偶登其地徘徊瞻顧山林樹色晴翠娛人江水自離堆直下勢若建瓴暢流無阻因念成功之難而斯地未可虛置也乃鳩工庀材建亭其中對楹爲廂房三間繚以石垣臨江一面取其虛廠特爲朱欄護之泮門外曠地數弓則留以植果蔬予捐廉五百金成之楊味時刺史因爲題額錫以嘉名蓋取韓魏公詩須臾慰滿三農望之意予謝不敏然良友贈言寓規於勸正足以勵吾志所未逮耳且斯亭之設水則盈虛了然心目尤便臨勘而同僚於公餘之暇

亦藉資憑眺惟經費不充規模粗具恐他日風雨侵凌其興廢有難逆料者
尙祈後之君子時加補葺俾成功不致朽壞尤余私心所切望也

重建灌縣奎光塔碑

道光壬辰年

周因培

奎光塔者何前明人以補地形之缺者也縣治爲蜀郡隩區西北靈岩玉壘
諸山環立如屏幃東南一帶平疇沃壤通望彌博岷江出其右廝流數十綺
交脉注西南青城天倉諸峯磅礴蜿蜒雄秀萬狀溪山環合雪川所爲世出
魁元者也顧蜀自漢晉以來爲天下文人淵藪而邑人士崛起者寥寥豈地
不效靈歟前朝有相地者曰邑南一面山水會合其勢下趨土囊之口直當
風門急如激矢風箭之忌其在是乎宜建文筆以蓄其氣於是度地去城三
里有壩平衍而低爲邑城關鎖處邑人從其術建石塔其上自時撥魏科登
顯仕者踵相接明季塔圯於水百十年來科甲蕭條闔晦較宋以前又甚焉

灌志文徵

卷三 碑誌上

三十三

有心者怒焉憂之數年前邑紳士亟請於前令邵李諸公謀修復均以解任
不果庚寅秋因培蒞任茲土閱數月百爲勸舉次與邑紳商籌及此僉曰邑
人蓄念久矣願公倡之乃以明年正月設局城中擇邑紳老成公正者任勸
捐之事閭邑人士咸慷慨樂輸匝月即得數千金於是仍其舊址相度陰陽
筮日興修百工皆出資和僱無業貧民亦藉以負戴磚石謀升斗之需經始
於辛卯之秋落成於壬辰之冬杜浮糜慎出納民不知役而工已告歲復取
支架餘材於塔左建小屋數楹購田六畝賃人居守登城憑眺文筆森秀聳
峙雲端依然前人之舊觀矣夫術士謬悠世俗惑志司風化者何取乎是然
嵩生嶽降詩人所詠人傑篤生必資山川清淑之氣明矣朱子嘗論堯都中
原風水極佳而有龍虎案山之說章本清又謂中幹龍萃產聖賢自宋末河
徙截其來脈者三會通河復加截之其力遂微則黃帝宅經所云移南徙北

陰陽交分和陰陽者氣也逐人變吉者化也其理可盡沒哉是舉也豈徒徇流俗之見其淳蓄山川之氣者有由然矣雖然此特培其地脉耳若夫學窮書圃行植德林所以蜚英騰茂者又在此而不在彼邑人士從此篤學勵行吾見地靈人傑符合響應必有卓越前修者能不企予望之耶塔圍圓七丈二尺高二十二仞費銀八千有奇樂輸姓氏及董事諸君例得分別泐石以垂不朽工成用申重建之說而誌之

重建蜀郡守李公廟碑

清同治六年

崇實

秦蜀郡守李公冰與其子二郎鑿離堆以避沫水之害又空內外二江廝渠引水灌溉田疇遂成沃野既歿蜀人祀之爲神至今作堰淘灘猶師其法歷代皆有褒贈然積久失實民俗沿譌今都江堰之祠專祀二郎而祔祀公於後殿國朝雍正間四川巡撫西魯特公憲德疏請加封二郎部臣曰二郎雖

灌志文徵

卷三 碑誌上

三十四

有佐父之積李冰實主治水之功今但封二郎而不及冰於義未協奉旨封冰爲敷澤興濟通佑王封二郎爲承積廣惠顯英王顧封號雖頒而祀典訖未釐正且附會小說並二郎之跡亦寢失其旨咸豐間學使何君紹基疏請更正格於部議寢其事夫子雖齊聖不先父食况以公之賢又有功於蜀其施力程能固無待乎其子今乃數典忘祖子掩其父得毋紊歟小民失而弗察猶可諉之曰愚賢士大夫知而不復諱正是誣也愛惜經費憚於更張是慢也使神失其倫序不歆其祀將何以蔭國而受福乎余謂雍正間既奉有諭旨其事昭然可無再請爰於乙丑之春成繇龍茂道鍾君峻將赴灌視堰工屬令相度形勢用謀改作鍾君視伏龍觀前地勢宏廠遂就原圯山門基址起建通祐王專祠而以二郎配享其後殿所祀諸神則仍其舊檄灌縣李令天植楊令若黼錢令璋水利廳吳丞寶林曾承寅光暨縣之紳耆蒲鑫賢

彭洵戴嵩申于筠劉璞張暉陽張學海等董其事命工勘估計費將近萬緡稟飭成都府屬需水州縣按照水冊量力捐貲隨即鳩工庀材經始於同治五年二月閱明年三月廟貌告成獨吉迎通佑王神供奉正殿用以脩廢典而答神庥既將事畢鍾君請爲之記予惟易言精氣爲物遊魂爲變是故知鬼神之情狀夫鬼神豈以情狀示人特神道依人而立揆之人心而安卽揆之神心而亦安耳然則是役也察倫物舉廢墜通幽明安享祀一舉而四善備焉鍾君之力也爰爲之記以告來茲

宋雲橋先生教澤碑

黃雲鵠

周漢時經生授受各有本師純係蟬聯累葉不忘所自非第終身奉之己也近代茲風邈矣吾聞蜀中宋雲橋先生遺事迥然想見古之人先生名履坦字靈岩號雲橋灌縣人以明經教授鄉里從遊者不惟騰蹕名場且多篤行

灌志文徵

卷三 碑誌上

三十五

士蓋先生孝友至性與端粹慈良之德薰沐使然而事師一節尤可師法先生少受業於中江黃映豐學博以好學深見器許比舉茂才食廩餼而黃君夫婦客死無子僅遺一女先生服喪如子出金爲卜宅兆置守塚禮嫁其女墓所距其居五十里春秋必步往祭掃且設位塾中晨夕事之終其身此先生生平事師大略也雲鵠曰卽此一事足概生平宜沒後二十餘年賊過其里猶羅拜如鄭康成宜邑人士久而思之旣祀之鄉賢又揭穹碑於道左以垂示永久也於世教師道大有繫焉不可以不誌

創建臨江書院碑

劉驥

國家重熙累洽俗美化淳車書絃誦徹邇盈遐固已成五登三矣而又嘉予吏民之能捐貲建學者重爲優敘編諸令甲蓋所以廣教化而培國脉也邑有鄉校在江之東而江以西地尤延袤夏秋之間岷嶺雪融洪濤滂瀆負笈

者望洋焉况石羊塲尤爲西疇名聚閭井糾紛闐闐雜沓厥壤旣沃而天倉
丈人諸峯如笏如屏若趨若驚鬱鬱蔥蔥秀氣疊鍾於人昔之父老嘗欲建
樓貯書延師講業重其事至今未舉牟君國洪暨其子朝峴慨然以爲己任
卜地於塲之西偏規畫旣定百役並興匠氏操斤陶人運甃版築登薨塗丹
暨茨經始於甲辰之春斷手於明年之夏嚴翼宏敞巋然澤宮其中爲講堂
堂之南爲齋厨北爲小軒踵軒而駢列橫舍虛白明淨其外繚以長垣循垣
植以嘉木茁秀舒英庇蔭窗櫺以是爲講貫之所不綦稱歎落成之日邑之
縉紳造焉咸曰美哉此舉盍言於公牟君曰是區區者敢他幾幸曰有善不
伐君心謙也有美弗彰余等咎也遂爲計其建造經費及所施義田共用錢
三千三百五十八千七百有零合詞以狀聞於邑侯史君侯爲戾止顧而樂
之爲顏曰臨江書院取其臨於長江云爾侯爲申於朝而得邀賜典賜以今

灌志文徵

卷三 碑誌上

三十六

銜錫之章服夫爲人祖父皴膚走利繕室規肥爲子孫計其他親族雖顛瘠
不顧此常人之情也而牟君產不及中家析其半以成此豈不念子孫哉毋
以積金莫如積德故樂而爲此歟雖然天下事有其倡之尤思其繼子衿佻
達鞠宮茂草古人蓋刺之矣吾願主斯席者勿素人餐勿虛人望循循善誘
若植嘉禾稂莠必去若蒔香草灌溉以時其成就之遠大者理學文章哀然
首舉與眉山鶴山諸鄉賢輩後先相望而其次亦不失爲端人正士以儀表
閭里庶有以仰副國家作人之意嘉予吏民之典耳至鄉之人有能取次捐
施以廣薪脯如陳登瀛之續立蒙館踵而愈大不尤爲吾鄉之幸歟是年鄉
人不以予爲謏陋延主講席因嘉其事爲之誌其顛末云

味江書院碑

傅秉常

夫杞梓梗枏賴栽培而益茂詩書禮樂資講貫而後明吾鄉秀挹青城靈著

玉壘既經鍾毓豈乏英才惟慶蔚起於人文必先振興乎庠序我家雅堂夫子學問品行遠近仰瞻設教數十年從遊者衆脩金所入買水田旱地各二十四畝山地一區均作義學公歎道光乙未以味江北岸介山水閭爰命匠鳩工建學舍二十四間題曰味江書院召及門囑之曰書舍雖成而延師訓課當俟予沒後庶免市德之誚也故辛丑年始舉行訓課繼因江水泛溢從學者艱於往來己酉年厥嗣宗圖遷學舍於柏江南岸綜夫子一生居家出仕俱以作育人材爲事而義學之設其嘉惠後來者更深且遠矣

司馬曾公德政碑

清同治六年建

陳召南

邑有都江堰舊矣昔秦守李冰治蜀鑿離堆疏二江陸海上腴資其灌溉二千年來若文翁若趙抃若呂大防俱遵法之水利聿興司馬曾公諱寅亮楚人也以諸生從戎力獲狂寇爲上憲所嘉保荐廣文司鐸靖州一時知名士

灌志文徵

卷三 碑誌上

三十七

競請益俄而黔中賊起公與太守謀帥師防堵賊不敢窺時宮保駱額門先生撫湘慕公才保知縣仍理學校會湖北來鳳有警公從容破賊蒙獎加同知銜奉檄來川攝昭化篆去冬制軍崇公以公才能應變調署成都水利同知公來灌卽覽邑乘觀水則詢諸父老無敢稍暇前此在官者出入騶從甚盛公曰吾稱吾職焉用是爲也每晨起卽詣江干隨行吏胥輿臺數人而已公據胡床指揮夫役輩攜鋤荷畚如子來趨父事其間竹籠之疏密磐石之高低溝渠之淺深曲折靡不悉心區畫鉤稽甚嚴以故胥吏不敢腴削民無所怨咨也顧吾思之士君子有軼異之才乃能泛應曲當公旣馳驅戎馬奔走風塵擒不逞之巨憝撫多事之岩疆茲來吾灌適觀察鍾公檄監修秦守祠公與同寅和衷共濟廟貌巍峨多賴其力廟後有岩曰象鼻左爲寶瓶口盛夏水漲巨浪奔騰直搗岩下勢難容納於是泛溢岩右頻年冲毀田廬公

橫築長堤以遏之堤上建亭以祀河神復立石柱石犀以厭水怪猶秦守制也噫公之爲民至矣教澤播湘而惠政傳蜀口碑載道又豈待吾民之贅述哉

重修文廟碑

朱振源

青城山水甲於西南灌口人文隆於巴蜀顧今不逮於古所云者何也山水磅礴之氣鍾靈必有其區人文發越之精毓秀宜詳其地苟不爲相其陰陽而定其方位則無以萃扶輿之秀靈而發揚其光氣此灌邑文廟所由不能已於重修也廟自前任孫公建造規模可觀方向未正科名亦漸替焉與予前後交接者徐司馬也每於任事時首以修葺文廟爲切務予前任事未久有志未逮丁卯春司馬延地師定方位庀材鳩工諸紳士捐資努力勸助其間越十月而予重蒞斯土夫司馬與我兩人誠與灌有緣我所欲爲而未及

灌志文徵

卷三 碑誌上

三十八

爲者司馬起而振之司馬所已爲而未就者予得踵而成之而灌之人士又樂我兩人之相爲接事而共相助以有成未必非我先師在天之靈所爲鑒其誠而使之踵相接俾斯廟之煥然改觀也今則啓聖皇皇棟宇新也正殿峨峨宏規整也兩廡巍巍丹楹麗也樞星瑩瑩文光透也鄉賢名宦祠宇爛然節孝忠貞棖桷煥矣諸峯環拱而來地德蘊中和之氣岷江迴抱而至天文騰奎璧之輝從此月朔瞻拜殿更聳於靈光科第蟬聯名俱登於雁塔都人士亦當體予兩人垣墉塗墍之心礪廉隅勤經史窺萬仞之宮牆樹三業之不朽不於今日之重修廟貌更榮施於無極哉因落成而書其緣起以勒諸石

培修慈雲洞碑

清光緒四年

陸葆德

山靈川瀆之氣附於有形之物則靈至其形不全則氣無所附將散而爲妖

春秋左氏傳神降於莘石言於晉厥類如此余素不佞佛載諸祀典者則祀之禮也宰灌邑之年夏六月視朔於治西秦守李冰祠祠負山山多石洞馳輿行其下見白氣冉冉如雲自洞中出歸輿往觀則前人因洞爲祀久而就湮者也中有佛像袍履儼存肩腹以上無存焉所謂有其形不全其形非耶抑其氣將散而爲民妖耶夫求福於鬼神而供給之佞也謂鬼神無靈而褻侮之慢也因其形不全而復成之仁也懼爲妖於民而敬奉之誠也亦慈也爰出貲令工覆以半椽復系之以文

灌城字庫碑

清嘉慶七年

王篤

夫人傑悉秉地靈文風攸關閭邑凡有一毫之增損當合衆力以栽培粵稽灌地古號汶山僻在西隅固彈丸下邑化遵東魯亦文獻舊區峙寶塔於青城並鍾靈秀導岷江於玉壘實有淵源名哲挺生人文蔚起在昔已然於今

灌志文徵

卷三 碑誌上

三十九

益信乃葱葱鬱鬱樞星之佳氣常存而困困盤奎壁之餘基少缺在堪輿小術固先達所不經惟惜字同心本吾儕所素具矧五星聚瑞聿開景運於文昌四海同風共戴奇功於倉聖駢詞門麗旣誇揮翰揆天斷簡飄零忍視斯文掃地於是多士樂輸羣力襄助煉石運甍遵矩就規旣虛其中尤飾於外珍隻字如兼金燼殘編以寶藏從此離明有象繇甲第於同人巽順咸亨歸文章於化境泐之貞珉誌其崖略等題名雁塔姓字生香期溥利鬻宮昭垂不朽

重修襄護王寢殿碑

王祖源

灌縣治西有襄護王廟由來尙矣昔漢蔡邕樊惠渠頌稱明哲君子創業農民因高卑之宜驅自行之勢以盡水利而富國饒人若西門起鄴鄭國行秦信臣治穰皆此道也史記河渠書志王鑿離堆辟沫水之害穿二江成都中

以見往侔禹烈來啓文翁澤賴生民功垂史冊廟食西川無間然矣願深洵
低作誓水立石人石犀實聖漢神烈濟美一時今廟前楹祀昭福王後爲襄
護王寢殿盛代尊崇祀典隆配於斯爲備光緒八年祖源忝膺簡命洊擢分
巡每歲冬春于役堰事必竭誠絜齊入廟式禮瞻拜靈旂於茲四載深荷神
庥先是制府丁公軫念民艱思維久遠計堅工修治金隄大固諸堰聿完涸
復之田歲千百頃餘百馬漕工擬興不果適源受任遂以屬委爰與權水利
莊君裕筠盛君時彥親巡履勘度其高卑相其利宜稽洵古蹟反覆指陳初
試濬之漕寬數丈深約數尺內地之水雖已少減每交夏秋雪消雨暴汎溢
漂悍齧漱魯嘴激射山麓勢猶可虞因思漕當水口非寬且深時其蓄洩堰
豈能容厥宜大濬誠不可緩更諮父老定謀職司迺復隄岸於故處等河身
與堰埒由是春足灌漑夏不衝決時和歲稔大有黍稷農民熙怡悅豫相與

灌志文徵

卷三 碑誌上

四十

僉善以爲余力余惟沐王靈佑仗國洪福承制府指授規略得莊盛二君匡
襄遵循水則相成厥功耳瞻望殿庭正深寅感適廟祝以梁柱蠹蝕告而甲
申之夏哨臺之陽又得神木有天然梁材之異請於制府蒙首倡捐廉暨諸
當道傾助原更竭俸繼之即以莊君董其事越明年乙酉二月制軍以例巡
閱道經灌口時常開堰源亦例至迺侍使節詣廟展禮敬酬神貺快睹殿功
之成於是百爾執事郡屬耆艾涵濡神惠軒輦靈異僉謂希瑞成功不可無
識謹記泐石昭茲來許銘曰岷山導江神禹始之作壩都江維玉媿之顯謨
承烈立石誓水深洵低作六字遺矩作述兼善並世濟美除旱滅溢穀我士
女秦漢迄今飲水思澤翼翼寢廟會昌建福上棟下宇舊久傾折哨臺效靈
神木天錫烈烈大府好古維則既新孔安憑依馨德凡我官民仰承精白肅
肅其敬神祇歆格雍雍其和神人協悅穰穰其慶年穀豐殖盡受嘉祥報惟

萬一維神之惠永奠梁益裕國足民胥蠶無極載刻貞珉傳於萬億

重修灌縣靈巖寺碑

李鑾宣

蜀西北隅岷山如屏障大江流其中江以外西岷爲岷山則天赦青城玉壘蔡蒙以南皆是江以內東岷爲岷山則九龍瑩華天彭闕至灌口而止靈巖距縣十里許天彭之支嶠也寺建自唐開元中攢巒峭壁綺綰繡錯夜神燈見崖谷間作作如流星吐芒東南有池曰白龍志所稱孳母池也龍藏其中請雨輒應在昔盛時喬林灌木蒙絡搖綴游目四騁畫屏隨面而列歲久斧斤入焉山槎蘖寺圯嘉慶甲戌夏五月不雨縣令邵君良步禱於玉皇殿甘雨隨至灌之民建喜雨坊以誌旣乃醵金錢具板築延浮屠圓僂董厥事圓僂又出菽藟之資以甃以甃以植鳩工於甲戌仲冬訖工於丙子季秋落成屬記於余余維天下建置之事有廢有興有廢而不興有廢而復興要

灌志文徵

卷三 碑誌上

四十一

皆靈爽精神之所貫注而發洩非人之所能爲也蜀自明季兵燹滌地而盡熙朝啟宇城郭人民俱還其舊至於浮屠之宮非郡縣所急或未之復焉然而國家培養之仁扶輿磅礴之氣衆庶煦育涵濡之化漸之旣久於是地潤其澤山效其靈吏勤其職民樂其和而靈巖寺與孳母池相映照或龍神所棲息而山靈所憑依者歟故於蒼生待命之時一顯神功之妙用以蘇萬民之困而施造化之權此寺之復興於今也固宜邵君以憂民之故禱於神而神應之民樂其有禱則應均其財而共治之浮屠圓僂又竭其力經營之以百數十年不可復舉之業閱二稔而歲事則賢有司爲民請命之心有以率作之也政事之暇豫民氣之恬熙浮屠之墨名而儒行皆不可沒勒之貞石俾後之人有考焉頌曰於昭穆清窮隆隆兮萬物資始鴻濛濛兮靈巖之山山斯崇兮孳母之池龍所宮兮吉凶同患感遂通兮旱暵不作民罔恫兮有

奔者廟蒼杉松兮有睟者容論鼓鐘兮頌神功兮慶年豐兮協風雨兮釐百工兮

重修般若寺碑

唐典翼

般若寺古刹也四面環山千岩萬壑誠勝境哉經兵燹後形跡略存其創制已不可考國朝定鼎初鄉人訪其遺蹤創修殿廡山門諸佛像煥然一新焉倘後繼起無人一旦廢墜其何以持久遠哉寺有山門一寺之巨觀也傾圮已甚僧孺懋於嘉慶十七年鳩工庀材爲更張之其餘亦踵事增華有加於舊諸檀越同心協助務民義以事神其功尤不可沒也韓昌黎云凡事莫爲之前雖美弗彰莫爲之後雖盛弗傳斯廟既創於前復培於後可謂盛矣爰勒石以誌不朽云

福德橋碑

梅春溥

灌志文徵

卷三 碑誌上

四十二

昔乘輿濟洧惠人留衆母之稱况路政修自民間不待司空者乎福德橋者去灌治二十里上通威茂下達崇彭舊增却月之觀突遇橫流之漲牽車服賈迂道而行越陌度阡迫人於險余等惻心已久孤掌難鳴乃於今歲之春丕振先民之緒大呼將伯廣結勝因法施泉流貪機霧滌用刊貞石允示後人莫言寶墨榮亭爲善有近名之迹伏願宣房築館聞風興繼美之思

王時齋先生行述碑

伍肇齡

時齋先生諱春元字子乾邑孝廉也少穎異每試輒高等所爲文若良金美玉令人見而愛之家貧而力學不倦雖饗殮弗繼晏如也同治甲子舉於鄉從者日衆先生隨材施教無不各得其益以去其事親也終日恆婉容愉色雖粗糲自啗而艱苦不形棄養日哀毀骨立後每與諸弟子言及猶不勝嗚咽流涕其教人則以敦品爲先嘗曰學者縱不能過人亦須求爲一平常人

故常恂恂自守不預外事然鄉黨事關名義勢屬顛連者則毅然不避嫌怨力爲主持十一年邑大饑所在艱食先生輟轉勸賑復念邑多釀耗糧並懇邑宰禁釀以裕民食是歲得不害先生爲人素廉介非義不受非公不至有古人風居恆訥訥如不能言及與人接無論農牧販豎皆推誠相與勉以正義故里中識與不識皆稱時齋先生而不名邑侯柳正汀慕其爲人嘗造廬就見晚歲益務培植無事不履城市十二年夏忽索水沐浴就寢而歿年五十二歿之日猶與生徒講學不輟光緒癸未鄉人士高翔雲左含芳等以先生素行純篤潛德恐湮合詞請於學使邵實孚先生邵公嘉其篤信好學孝行可嘉給予經明行修額以彰潛德其及門思先生教澤將勒石以紀求序於予予維先生大節並足典型謹據實書之以告來者

上元宮碑

鄭翊清

灌志文徵

卷三 碑誌上

四十三

上元宮創自明萬曆間曰天臺寺爲浮屠所居國朝康熙五十年始易名本洪菴殿宇傾頽僅一僧名自埃難於住持有道士李太浩者給資接收雍正八年欽憲分巡各省飭州縣勘量田畝造冊呈報有雙合聯票爲據一存官一給業戶此本洪菴之名所以達部也菴後循定江而上度嶺十餘里有上皇觀建自明正德間歷久荒蕪太浩於康熙五十八年與謝清元師徒協力培殿宇清山界廟祀賴以永存此本洪菴所以兼理上皇觀也太浩往來兩地不憚崎嶇於雍正丁未年羽化乾隆三十年有李陽純師徒復恢其業乃更名上元宮日新月盛至乾隆四十二年張教海綜理上元上皇丈人三觀類皆有功可紀者宜勒碑以貽後人

崇德祠刻石文

清光緒三十二年按光緒元年邑令胡圻所書詞意略同

文煥

深淘灘低作堰六字旨千秋鑿挖河沙堆堤岸砌魚嘴安羊圈立拜闕留漏

罐籠編密石裝健分四六平潦曠水畫符鐵椿見歲勤修預防患遵舊制毋擅變

重修靈巖山玉皇殿碑

清嘉慶十五年

馬陞崇

巖之爲靈昭昭也然不緣神功不顯不藉人事不遂今歲亢旱大憲爲民祈雨彌月未應邑侯邵公齋戒沐浴禱於寺之玉皇殿既而精誠上觸密雲起於谷中濃陰布於四野甘霖肆沛自灌而始遂以及於全蜀商賈歌市農夫怵野我侯見麥禾之芄勃亦欣然色喜乃召僧人圓樵而命之曰繫神之功是不可不有以報也與其補葺不若新之吾爲倡募聿觀厥成一切惟爾僧是任僧曰唯唯於是鳩工庀材閱期年而功竣僧乃請於侯曰繫神之功亦侯之績是均不可沒請壽諸石侯曰不然吾爲爾民豈爲吾名僧曰固也然僧愚有不釋焉今夫註聖果者昭法象結善緣者廣福田以侯之念切民依

灌志文徵

卷三 碑誌上

四十四

默叨神佑而無以昭示來茲沒善掩功民罪大矣侯何靳焉侯無以應爰備其事之本末以告陞崇曰願有記崇曰近二三歲寒暑不時風雨不節蜀民之飢而疾疾而死者雖大吏設法調劑而卒難振救也我邑侯以一誠之感召起萬姓於瘡痍春麥芄芄秋禾彳亍今歲全蜀告豐遠近無恙其所以戴恩澤而享安全者豈僅吾灌民已哉而侯不有其功歸之神力復爲經營新廟以永徵神惠其所以愛吾灌民者至吾師平日以節檢力行之資得與侯勩茲盛舉鬱而必彰亦非偶然而靈巖寺自唐始闢得侯守茲土而神益顯得師宏此構而名益彰巖之爲靈昭昭不洵然歟夫載筆記言上備輜軒之採下廣邑棄之資者邑人士之責也爰述而勒諸石

利涉橋惠政碑

清光緒七年

唐述宗

灌西白沙江久廢成梁夏秋水漲則風雨舟停民病涉焉今年春丁公奉命

西巡適過此見傳軍無瘞木可乘士民少瓠瓢可佩鑿石伐山皆自崖而返
買絲抱布亦望洋而嗟不逢鄭相之興難覓金仙之筏遂迺倡捐委吏搆索
爲橋蹟著崇阿名題利涉夫公之沛澤蜀中普矣免貨厘裁夫價停開鑿築
隄防而且積谷賑飢德周興養完糧禁役恩免追呼移鹽羨以歸公暗解誅
求之困汰節規以察吏潛消貪贖之情豈惟是區區者利萬姓之往來重一
橋之造作哉然此山谿之險適當官道之衝張襟帶於東岷扼咽喉於西徼
二百年再見津梁商旅罔滯數千里直通文報政教攸關便國便民並官紳
而同慶遵道遵路合夷漢以騰歡福已造於金隄功更高於珠浦戴澤者咸
歌利濟修史者采入成篇知非徒偶度馬蹄踏銀臺之積雪間登螯背瞻玉
疊之浮雲也已

灌縣重修安瀾橋碑

清光緒二十年

吳之英

灌志文徵

卷三 碑誌上

四十五

灌西有繩橋砦岸而質剖筌爲縉設旁帷橫江栽之牽面齊氏栽若股牽若
穀氏若臂加衝木其間尺樹柱二列有榭疏健布幹周氏屬幹惟栽屬柱鈎
系之正中柴桺以皮于彼是闕崙咫堂爾范君萬選蒞灌之二年野廬慢火
燬焉帷爲血栽爲燎氏爲灰柱榭柴桺炭焉質之砧者殞礫者礮礮從橫
雖然爲丹爲粉則喟曰是橋通道西南不可以弗治也乃壁岸新礮之胜其
股豐其臂壯其穀求柱榭以鄉心而遠根者傳柴桺以直理而闡明者土有
工石有丁竹有工金有工木有工陶墮有工雜以會錯然而李穹梁既亢堂
闕迺而鄉父老執事請曰斯役也材拙而用完工塊而制堅業在述而偉礮
倍乎前盍系言焉君曰不然水涸成梁時之令也弗夷道路官之職也營因
舊規未敢信其有加也特以吾民樂輸其力忠之屬也是則可以志也直英
在灌學間巡勞焉志之曰蜀道般紆山塞川矜舊史所傳有棧有繩岷精絡

井江華初迸有橋編竹衡跨其頸作鱗動鬣蠕延延仰欽素沫漬爲清湍
大火西流祝融戒駕竟蛻皮骨一朝神化乃度故止斲石削崖名材新奐麗
構重開密織老篴截空排鞅鄧林之徽謂川之篳工師獻技成緒嵯峨冽寒
寫翠淼淼深波經計何力子來帥誼慎告後人毋荒葺治

重修唐隱居祠碑

清光緒二十年

吳之英

道有晦時必欲行之爲人病必欲言之爲文章病病焉而咎道實非道之繫
嬰之也唐以詩舉士士皆爭自雕飭凡曼聲亮節鏘曼流韻皆蜚踊翰林乘
冊軒駟泊于衰季猶相激帥无勦然味江唐求澹泊喜靜不求溷濁之名舊
紀稱王建延爲參謀弗肯屈因共號爲唐隱居不傳其字居味江山麓以終
嘗襲巢父故剖瓠作瓢所爲詩輒丸而實之積有幾无筭數也旣而瓢泛于
下流新渠識者曰此隱居瓢也胡至此近死耶揀丸錄之得詩篇數十今唐

灌志文徵

卷三 碑誌上

四十六

詩中所集一卷是已嗟夫隱居身已不顯將不必以詩顯而猶留此瓢其有
不行之行不言之言者在耶可謂修道眞者已有記隱居爲大邑人或又記
爲崇寧攷味江源出青城青城唐稱丈人山然則味江山青城支別也青城
今屬灌西故灌西舊有隱居祠學子輩尙論文獻慕思其行義文章拓祠宇
新之請爲記記曰白藏西運令主秋犖盛隆之會功實所收若邁衰微名材
名隱江饒蚌蛤山蒸芝菌青城孤峯爽氣叢叢支分汶阜江水以深歷閱前
輩因時養晦翩翩荷衣繹繹蘭佩有唐之季乃傳隱居高臥味江其道則腹
孤介難容厲節忍性悲憤所激成此危行姑爲巽語寄之于詩輶軒若採尙
閔狂辭瓢亦隨波漂流矢志今所傳錄十无三四或賦或比理韻清醇後生
薄古號曰詩人烏呼先生名德弗薦瞻望祠堂精神猶見用加培護託始經
營植之樸斲亦飾丹青春秋吉日霓車風馬馨香昭假肅乎來下文獻攸繫

愴動予懷普識嘉德以告方來

宋公兆熊祠堂碑

清光緒二十七年

吳之英

光緒二十有一年春水利同知宋君夢侯卒於官篋無藏貲都人士爲之歛具並其父母妻柩之寄殯省城者遷而窆諸北山之腹又於南郭立祐祠而祝之越六年朱君樾卿攝廳事過其祠曰材脆而工窳圯將及焉爲掘土構木施聖加漆歷月祠成記曰几上操刀人爲搔臂井上弄瓢人爲捫袂權能媚人亦爲人媚一鬻爲歡一勺爲患君司溝洫順時啟閉職屬冬官在灌如寓如何人士感念恩私祔祔豐墓洫洫清祠乃知權尊不如德厚醇德厭人穠于趙酒飲見交情一死一生寢廟再新乃勞故人故人愛君親篤乃爾非君篤故何繇至此烏呼憶昔朔風高笠淺屣霏雪滿衣奔沙滿席行歌江天孤鍊寒魄霍爲摧折風流永隔烏呼堂塾更肅鼎俎維閑魂兮歸來有芷有

灌志文徵

卷三 碑誌上

四十七

蘭

普濟橋碑

一名南橋

吳之英

大江歷松茂來灌城西犁爲兩外江右出內江摩山足齧離堆鯢蟠爲淵灑城南缺然東注故南門外路不達郭出城瞰江澳縣流激瀉時聞沙石相爭鳴不可涉也光緒戊寅冬令長陸葆德相可梁之地直城門數十步壁其岸對岸約半里亦石其壁江底比櫛爲之磧柱貫巘柱間格木嚮以橫傳縮木聯之褻之齊之旁爲之楹構榕栢瓦而覆之容三軌焉越二十有一年歲在戊戌夏水時至淺撥長樅纍屬篙工失拊扱力觸梁柱憂札梁柱三數衰樓且震扞栗陳令長偉勛攝灌事帥邑士馬順璋易象恒王盛基張家駿唐應麟呂文華梁履中仰光忻劉華謙晁元鼎賀鴻濤等理而新之復其舊記曰西瀆東注潰潰洸洸未可方舟豈曰爲梁灌城之南離堆之下有橋巖然

交積松檟陸經其始陳復修之人士輸力落祭以時一再勤斲成此令緒後來嗣者續舊罔墜

都江堰復籠工碑

清光緒十六年

佚名

古者自都呵及郊疆立官師主興役駟見火觀期諸司里平津塗鼓井竇障陂澤成津梁無不便於民改着夏令志其時倣明受事之職爲政之要也灌縣成都西北邑岷山導江至是中分洪流浩奔勢截灌口秦李冰鑿離峯鎮以石犀立磧畫水引溉郡田沃潤千里厥後盧翊籠竹寶石因時立制用以宣洩水勢箋石繩貫湍暴平夷天彭割張玉壘坦涉歲食其利千暮百朝繹繹旒罔有潰越光緒二年平遠丁公來督是邦礎石築隄實期久遠泛漲潰圯漸至豁崩黔首荷鉏徘徊望洋墮石愕咋橫罅江流十有二年諾絡承公厚以宗伯連公次子忠節明公之弟贊襄比部觀察成綿巡視屬邑用增

灌志文徵

卷三 碑誌上

四十八

憫惻咨訪父老議復舊規迺請於制府盧江劉公秉璋敕工度財伐竹籠石謀鞏固之利圖永底之業勤官分之務復百姓之便於是衝波怒輪騰潮激鱗豁淙谷湍衆匯瀦洩礎鬪低平駢陸密緻蜿虹孤綳離離遙合爰田安灌溉於上悍泐殺蕩突於下縣縣利澤鮮遺阻艱邑之人樂蹈曩利言於郡丞朱君錫瑩令尹龍君錫恩刻石紀銘不沒其事銘曰公來其初其績有序巡視咨嗟憫民疾瘡民之皇矣田廬浸漚水勢方驕沈竈漂沍公度以舊無泆無備湍湔之厄平其倍咀伐竹青城輦絡編箋興於衆力沓沓澍澍時釐爾成羣用撫詔在昔秦守洪波是主兀睨石牛蒼茫浦秩秩扈扈列刻碣圉后有廬公克紹前矩千載祀薦燿闐舞鼓迺易舊制頓失其所儼僕紛靡或磔或掎匪公之力疇克支柱淳潛既潛師翼庭伍立石頌功昭垂萬古

胡公新置義塚及欄馬牆碑

清同治十三年

黃宗幹

夫掩骼傳月今之經恩周泉壤埋骨溯周王之德澤及枯體逝者如斯落魄
在清風明月掩之誠是招魂於蔓草荒煙或遊子死未還鄉姑厝於北邙山
下或貧民生離度日遂葬於東郭墻間然而世代遙遙無妥幽魂隙地荒墳
纍纍賴施憫澤仁人且馬放番夷踐踏幾難入目犬拖枯骼委棄誰復關懷
幸我邑侯胡公洫任灌邑心盟白水室懷青天惠政則人盡銘丹愛民則情
同保赤臨郊履視撫影愴懷爰將北關義塚接壤之山捐資購置竹林寺外
我瞻京觀之封柵木岡前羣比范公之德更爲繕修欄馬禁馬踏於墳塋定
知路絕哀鴻感鴻慈於存沒從此青林黑塞永無遊蕩羈魂冷月寒霜不少
感恩新鬼九原沐澤億載流光溯聽騰歡遍野萬家號生佛之聲行見作善
降祥百代造公侯之福

補葺奎光塔碑

清光緒十四年

朱錫瑩

灌志文徵

卷三 碑誌上

四十九

夫旃檀秘辭實緇流供養之誠金寶莊嚴豈元化暢敷之道况規維形勢雄
圖每致傾淪拘制陰陽福澤究難翼倖然山頽鐘應氣類以相感而通嶽降
崧生英靈原積厚而發證慈恩之佛果經記千名聆彰德之童謠兆先二姓
豈必道通子午關螽斯麟定之徵城象方圓挹鳳翥龍蟠之氣奎光塔者前
明人所以補地形之缺也爾其直上千尋周廻百步逞班倕之巧思符張郭
之吉占文昌偕武庫爭光毒螫與封豨永靖衝承嶮阜山有餘輝橫帶沱江
水無洩秀每當春和秋爽含煙藻天地之容野曠川激望氣扶風雲之助珥
紹珂里蔚起金張吐鳳瓌材代儲楊馬泊乎雨淋日灸光掩琉璃遂乃碣斷
碑殘委同塵土羊家吉穴片壤鑿空杜氏康居浪沙淘盡撫崇階之就沒嗟
傾臬其誰支前令周公因培汝南望族臨桂名家握瑜瑾以自珍提鏌鋦而
小試泉魚夜狎識單父之恩周隴翟春游想中牟之政異尤冀冠裳鱗爪鼓

吹膠庠碑爲山九仞之功彌願海七重之量從瞻吉曜摩天闕而高曠大起
頹網託坤維而永鎮復於環塔規置數楹取支架之餘材作崇基之保障巍
然禮殿儼留石室之遺卓爾豐碑更勒浮屠之頌洵堪報隆俎豆壽協瑱珉
余承乏導江頻臨勝地仰芳型之踔躒無自追攀覩傑構之嵯峨半歸剝蝕
荆榛簇而坳垣沒苔蘚滋而砌石斑將欲永賢宰之聲靈肅文人之瞻仰不
誠難乎爰籌捐募竊欣嚮義如雲甫事經營遂乃觀成不日咸以寺臨兜率
借詞彩於子安樓眺岳陽擴胸襟於文正豈可使前規大壯徒有崢嶸善量
同人竟忘記述自愧才輸班馬不長紀事之文技試雕蟲留作題名之助

孟慶元先生遺澤碑

余漢章

先生姓孟氏諱慶元號竹山邑增生也祖父昆弟並列膠庠家學淵源神恬
氣靜貌恂恂如不足德汪汪其有餘漢等仰承化育深荷栽培悅顏色之猶

灌志文徵

卷三 碑誌上

五十

親過里廬而悵望恭同修墓累有積餘商置祭田馨香永薦憶春風之入坐
偕化日以舒長此學子尊師意也亦人間重道心也爰書匡略敬告將來

丁公祠碑

陸法言

蜀守文翁尙有千秋石室杜陵詩老猶存百代草堂况川督丁公之纘禹續
而恢秦緒者乎公自莅蜀以來周咨得失備考廢興賴此離堆患分沫水蔚
成沃野利在都江恪守六家之心傳可作中流之砥柱爰乃爲民請命利害
敷陳發帑興工遵循舊則公惟存禹稷之心願溥膏澤而民協風雨之好思
薦馨香故當戶戶買絲家家畫扇矣於是選勝地屬羽流小築樓臺宛對神
仙窟宅大名字宙直同丞相祠堂修葺捐資守祝有費慶初度於嶽降頌協
岡陵歷不改之歲寒齡延松柏以是知立功立德成當時不朽之基旣溥旣
長遺後世無疆之福若彼碧雞金馬之祀語多不經更未可方駕也已

竹園檔紀功碑

王如曾

稽古賢哲達則兼善天下窮則獨善其身若夫一鄉一邑爲斯民造福功在一時而惠及千古者恆不易覩如羅君瑞軒之於竹園檔蓋有之矣吾灌歲修都江堰購竹編籠大小河充竹首者四人上門戶竹者百有餘家自清乾嘉以來悉仍舊貫始而竹茂值尙平均繼而山枯價益翔貴竹首賠累漸臻迭請補濟終於得不償失加以江水氾濫需籠愈多檔民之破產者恆十八九羅君憫之謀於衆請豁免府縣轉詳大府幸得允百年積困一日昭蘇洵如大旱之得雲霓荒年之遇菽粟懿乎鑠哉厥功偉矣昔大禹導岷江李守鑿離堆萬世永賴羅君雖遜於此而其惠及無窮則一也爰勒貞珉以志不朽

傅孝廉碑

張申五

灌志文徵

卷三 碑誌上

五十一

傅公秉常字彝廷號敷五幼讀書艱於記誦爲文則穎悟過人弱冠補弟子員從劉芷塘先生習舉業己卯舉於鄉以大挑署鹽源縣教諭旋授峨眉縣訓導兼長書院從學者衆學舍幾不能容循循善誘峨人甚德之咸豐庚申藍寇圍城公與同寅分守尋寇遁議酬庸公弗受因告歸日以勤儉孝友勗子孫壁間皆有箴銘無事則手不釋卷也公和易近人然事關名節輒義形於色生平儉而好施於寒士則助之於貧民則周之順時告終享年八十有七子宗屋爲申五之同年述公行誼因爲志其大略云

傅醇齋先生教澤碑

高履和

古之學者必有師師所以垂教澤於無窮者也我灌南傅醇齋先生卽其人焉先生名宗屋號醇齋以諸生設教西河咸豐乙卯舉於鄉適尊公自雅州教授解組歸承歡喜甚遂以堂上春秋高不急求仕養親三十有六年中間

應崇慶州牧程公聘主講漢原書院旋辭歸主味江書院朝夕必歸省親及遭喪服闋邑侯莊孫繆諸公咸慕其爲人聘主岷江書院從遊者數百人名旣騰蹕復多敦品士何莫非先生之德薰陶所致哉他日後生小子必有讀遺碑而私淑者矣至於文章典雅猶不足以盡先生之大所謂扶翼世教者微斯人誰與歸

尹星垣先生教澤碑

尹昌齡

先生尹氏諱昌奎字星垣邑之著姓前清爲諸生性孝友風格峻整以鯁直名於時人不敢以非義干事有不平輒直折而婉導雖強橫者恣服鄉黨中至目爲包孝肅焉其他排難解紛和人骨肉釋人仇怨者尤不可勝紀而能令門弟子之感戴不忘刻鏤心鬲則以受先生之教澤深也先生爲學宗濂洛生平教人以身作則不爲華飾四方來學之士察其資稟高下因材以施

灌志文徵

卷三 碑誌上

五十二

而一歸於實踐文章必根柢六經絕去浮靡從遊者一經指授率有以自立登賢書遊庠序者濟濟焉今先生往矣門弟子請於余曰我輩追維函丈如仍坐春風中所慮年遠而事蹟失傳後世無私淑者耳予感其誠因志匡絡庶後之覽者聞風而興起之

彭氏姑婦節孝碑

周家楣

世之懷忠節矢艱貞者不獨致身君國爲然即閨閣賢媛亦有之第善始不必善承共姜勵節未聞再咏柏舟李密過庭己是含悲奪志此一邑一家守義者不間出尤不疊出然兩間正氣未嘗或絕雖運殊世極往往有人焉足以光史乘而表儀型當同光間太后垂簾勘亂反政而後急理陰教詔各省設採訪節孝總局悉拔幽滯惜貧無力者仍就燕沒曷勝感歎予爲京兆八年甲申蜀故人子彭君立中以供職來京爲予言其鄉之柳街場有疏族姑

媳兩孺人節尤苦蔣配希古早寡遺一子宗熹舅姑日號泣懼弗終蔣慰之刈草漬麻以供粥時爲人傭以事以蓄必得舅姑歡晚稍給爲宗熹聘吳無何宗熹病且革蔣使人語吳曰吾子不可以久請他適毋累吳矢必歸彭蔣曰吾婦也擇日迎配甫四旬宗熹亡家益落蔣亦相繼就木吳盡鬻嫁事葬蔣焉服闋繼志述事日奠蔣及宗熹之主蓋終身弗去髮也鄉人憐其貧無可守有勸再醮者置弗聞晚撫子續宗熹祧兩孺人蓋皆守志四十餘年初蔣吳寒介鱗鮮往來故弗獲探報時孚因其叔昱營報入邑祠思立石旌之囑予爲序憶予同治庚午膺命視蜀圍輜軒所過歷覽岷峨之秀江漢之靈意必有龍潛鳳翥所稱賢豪間出者夫蜀自開國大禹實生石紐其後英材碩彥若淵雲軾轍輩代不乏人弗論矣至如巾幗幽人世稱文君薛濤花蕊諸媛不過以才藝聞無當於倫常綱紀之重兩孺人獨勵修飭已傑出於陰

灌志文徵

卷二 碑誌上

五十二

教修明之朝詎非上有堯舜下有巢由千古固同揆歟在昔殷商伊尹之後有伊摯巫咸之後有巫賢今且得之兩孺人誠女子之象賢者矣予尤慕立中敦厚族誼振拔單寒異日膺民社爲朝廷布化不使一夫不獲可知已傳稱蜀人好義信然

儲秀書院碑

王崧南

學記曰建國君民教學爲先斯言亮矣三代之學由秦廢蜀郡之學由漢興而天下之學由蜀起自文翁守蜀招下縣子弟從學京師蒸蒸向化自漢以來經明行修之彥代不乏人我朝崇儒重道加意荒陬隨地置學前邑侯容齋恆公念茲地近邊陲延師主講暫寓神祠今夏乃於寺東卜築諸君子好義急公創建學舍三十餘間堂室楹厨牆垣皆備多士雲集薰陶禮教爭自濯磨將必有類司馬淵雲三蘇者接踵而出不讓文翁之化比齊魯也

重修城隍廟碑

馬繼華

蓋聞世室不修失禮滋誚闕宮有恤落成可褒是則丹楹刻桷詎邀福於渺冥悍患禦災當報功於夙夜向者熒惑爲殃鎮星失守雩祭難伸忱悃春秋莫展明禋託庇神君深勞擘畫爰資義士慎選棟梁美哉輪美哉奐寢成孔安絜爾牢絜爾羊神保是饗風銷雨蝕扶持尙望於將來德峻功崇祀事不踰乎典禮貞岷敬勒亘古同光

胡公行述碑

譚繼洵

公諱宗禮字履之世居岷山之東考諱士杰字恬齋學成不售改吏得官職授登仕郎公幼慧性剛直力學之年卽兼持家政凡一言一事俱恪守先哲格言其有切於天理人心者必書座右以自警鄉先生輩皆重視之應童子試以高列補弟子員旋食餼文譽益隆從學者自遠至公嚴立課程務以窮

灌志文徵

卷三 碑誌上

五十四

經明理爲教登仕公性尤烈公稟庭訓必俯首而受遇呵責未嘗不霽顏恆終夜泣然泣思所以慰親志秋闈屢報罷乃以明經貢成均註選訓導時登仕公年八十有六猶親送至學使院應貢士考人稱罕見公獨以不得一第爲恨生平嗜讀書好施濟耄期猶勤里鄰有急不待告助而予遠近稱善有聞之因改行者晚年作有陰隲文詩待刊其子孫自幼入家塾手澤親授以至成立課讀餘暇卽講忠孝大義嘗謂吾族必繁衍願汝曹積學爲國家儲楨幹不願以小就終也哲嗣光祖歷任黔高等縣學篆孫昇猷知府銜升用直隸州知州陝西岐山縣知縣烜猷同知銜甘肅卽補知縣昂猷提舉銜選用通判子若孫成名類皆公栽培之力以孫昇猷貴誥封奉政大夫昂猷貴晉封通議大夫卒年七十有八實咸豐己未四月二十一日也洵與次孫烜猷同官隴右攷其世家及觀公行狀隱然有直道存焉謹按敍而銘之銘曰

岷山之精賢哲篤生文章道德爲後進程書法晉康名貢成均庭前詩禮先後繼承設教西河嘉聲響接布德施仁閭鄙任郵耄期猶勤詩詠陰隲隱德遠遺子孫逢吉

丁公祠碑

陳廷先

平遠宮保鎮吾蜀凡十年當公壽時人有以章南康致頌者公掀髯笑曰南康遭逢平世常厚斂以充軍實卒至軍府盛而黎甦重困晚年又爲月進終致劉闢之亂大臣自命止於是耶頌者愧焉聞者疑之余曰吾蜀自秦後稱循良者文廉而外李郡守諸葛武侯其尤也世言武侯之治蜀也約官職明賞罰立科條吏不容奸人懷自厲公則絕苞苴裁夫馬簡賢黜劣其用人似之武侯立法度示軌儀撫百姓刑法峻而人無怨公理鹽政飭吏治毅然不撓緝奸民數百人駢戮於市風化肅然其行政似之武侯征南擒孟獲伐魏

灌志文徵

卷三

碑誌上

五十五

司馬畏如虎公以書生練鄉兵保境撫東省督師勤王先後平巨寇其能兵似之武侯沒內無餘帛外無贏財公開府建牙逾二十稔臨沒棺斂醮白僚屬其操守似之公非隱然以武侯自命耶至其治水也則一遵李守成法周諮博訪務得款要毅然費十萬金而不惜故自大終後成屬無索水者於此見公之自待者厚而所志爲甚遠也昔人稱南康爲諸葛後身視公之學古人較其所得孰離孰合必有能辨之者公治都江堰節蠶親臨凡十一次灌人食公惠爲建生祠於李守祠下像甫成而公薨若有神契歲值生申之辰官民操瓣香薦冥福道士賈教政請傳諸石誌遺愛也嗟乎中興之世人材衆矣數十年來落落如晨星其撐柱乾坤澍濡蒼黎知有國而不知有身如公不數觀也公誠今之古人哉

重修安瀾橋碑

朱錫瑩

灌治卽蜀漢汶川郡也西二里道通金川岷江割然中阻斫瀾流急失利舟楫守土者規跨笮而渡水經注謂汶山郡渡江有笮橋者是邑乘以爲古珠浦詳不得聞淳化元年安定梁公楚以大理評事來守是邦恢拓故址增置一新因以官名橋歷久廢弛邑人設義渡以濟往來冬涸則連筏可濟夏多覆溺之患國朝嘉慶八年縣令吳公昇仍舊制而重建之更曰安瀾今之名卽於是乎昉橋比歲必一作由三費局於伏龍渡田租撥給年中培修卽責成局士經理多歷年所行人賴焉光緒丁亥夏瑩權篆斯土覩茲病涉竊幸先正之成功匪易詎初秋霖潦大漲向之長虹互空者旣蕩然無存而輿者步者提攜而負載者莫不臨河浩歎邑之人以未經緯直之故歸咎當事酌伸明罰以孚衆論警將來也然舉廢持危司牧之責迺與水利廳宋公兆熊倡捐並集紳民勦盛舉張君朝均吳君國珍唐君述宗劉君玉鼎咸欣然首

灌志文徵

卷三 碑誌上

五十六

其事鳩工庇材身任弗辭用是撼中流以豎柱斲石磴而引絕長九十丈高二丈五尺袤丈餘殫心經營甫兩閱月已如觀觀矣橋落成日適道憲開堰至嘉其工之巨而成之速特進執事獎勵之執事退請曰民未病涉亦善政之一端昔甘雨歌崔瑗之功璽書褒馮伉之治凡在恤民靡遺記述是舉也可無言以壽瑱珉乎余曰慷慨捐資斯民之好義踴躍趨事諸君之急公余何力之有特懼過者罔知勤而蹈其失也乃記之

新開長同堰暨建祠碑

清光緒二十一年

王澤霖

事創難而守亦非易乾隆初吾灌自玉堂場抵太平場沿山皆旱地人苦於事倍功半十九年大府黃諭民致水予高祖天順公暨艾文星劉玉相張全信諸先達具呈郡守張飭邑令秦侯規畫各倡捐數百金開堰與王來通等五人相度地勢仿李王劈離堆意於橫山寺鑿岩越三年石工乃畢由是並

山而南達石崩江置閘引水分三段焉嗣經宋侯指示堰務始成命曰長流水勢沛然終經嘉侯履勘謂可開至太平場下則於長生宮後析堰爲二更號同流而以長同合名之墾田復增二千餘畝蓋是役起於乾隆二十三年訖於二十九年共成四區每區附堰田六百餘畝其灌溉所及不下一萬餘畝利亦溥哉嘉慶庚午年文公哲嗣正榮孫灤暨開堰碑誠善繼善述者已而山溪障塞水不足用灤思租德而以利衆爲懷道光初捐金通修人咸稱之及道咸間金廠肆開炒落堰塞田轉旱者殆及千畝爲害大矣艾公曾孫秉乾不忍前功遽沒同治癸亥年命其姪四人約王張二公之孫五人同堰者若干人協墾通修王侯勘審命加石規二尺並增神仙洞與濠子堰石規永禁唐姓修碾僅留一磨至李侯乃息訟條示朗存所費約七百元後因筒車涉爭晁候斷令小滿前五日下溝自此水復暢流上下齊插而堰有中興

灌志文徵

卷三 碑誌上

五十七

之象焉澤霖以舊碑漫漶不能垂久爰綜匡略壽之石前二碑仍存別以小碑勒規條告示姓名無失特念諸先達功在一鄉堰雖載入縣志而未蒙議敘食其德者每勸王艾劉張之後裔爲四翁建祠歲於開堰報堰時致祭令後人見之飲水思源矜重堰務庶不至忘其本始古所謂鄉先生沒而可祭於社者其在斯人乎小子敢不誌之頌曰農以水興利賴千古首善有人堰功斯溥深省發予晨鐘暮鼓同事同方神應有主無私非公祈報得所竟委窮源馨香不朽

周椿園先生祠堂碑

陳炳魁

邑之南三里許有塔曰奎光塔右有室曰蜚英山館邑侯周椿園先生所建也父老子弟志棠舍之遺愛仿桐鄉之建祠馨香禱祝於斯者三十有餘年矣同治八年秋邑人士咸集塔下顧魁而言曰先生之治灌也以清廉居官

以勤慎聽訟以嚴明約束吏胥以慈惠教養士民父母吾灌者六年嗣大府檄邑津貼巨萬先生捐廉千兩再三籲請豁免之卒以此忤當道未幾遂調任閩中左遷教諭噫下恤民艱上千憲怒雖古循良詎多得哉且先生去官後重來灌遨遊青城道旁十庶羅拜咸流涕太息曰此吾青天也當是時先生行李蕭然書數卷篋數肩幾無資斧歸而先生意泊如也謂非有所自得於心乎迄今望寶塔之巍峨慶科名之顯達讀所刊養正篇區田法公門修行錄諸編先生之功德猶歷歷在灌人心目中倘不勒石而永垂之恐年代遞遠文獻失徵不惟無以誌公美而且無以勸吏治也魁曰然謹誌之

重修盤龍橋碑

陳炳魁

古者天根見水潦涸而王政特重成梁所以宣時令普利濟也灌據天府上游城東十八里有走馬河分徐堰河析流三里許適當官道最重要國初架

灌志文徵

卷三 碑誌上

五十八

木爲橋名曰盤龍乾隆癸酉始伐石易之嘉慶戊寅又增治之其鞏固百餘年矣同治五年丙寅夏大雨連綿洪水泛溢岷江內外南北諸渠悉驚橫流爲害徐堰河水道尤狹轟雷激石擘岸囓隄而橋遂蕩覆無遺凡馳羽檄乘輿馬走擔荷靡不臨流躑躅嗟病涉焉冬初水落王君蘊山童君筠圃董君昆山張君宜庵等聚鄉人而告此曰省邑通衢也昔者河僅三丈今八九丈矣將還舊觀費恐不貲坐而視之如行旅何爰共募千餘緡仍購木而重建之明年春二月鳩工始事操斧運斤淘沙植椿排梁鋪板繚以朱欄覆以碧瓦訖五月落成巍然翼然壯如樓閣夫川澤無治單子歎之溱洧無濟孟子譏之今諸君子慷慨而勦是舉遵王制復舊規利衆行一舉而三善備焉矣於是乎記